

Маҳмуд ҳикоятиким, ажал оғир уйқусига борғондин сўнгра Масъуднинг тушига кирди ва адолат айнин пайдо қилур учун анга пандлар берди ва насиҳат зилолидин анинг юзига бир сув урдиким, ани гафлатуйқисидин сескандурди

Ешиттимки, Маҳмуди 1 ғозийға даҳр  
Чу жоми ҳаёт ичра ҳал қилди заҳр.

Қилиб «иржии» нағмасин истимоъ,  
Ружуъ этти оламға айлаб видоъ.

Жаҳондин узар чоғда пайвандини  
Валиаҳд этиб эрди фарзандини.

Чу ул айлади тарки дори фано,  
Фироқида ўғлиға эрди ано.

Ҳамоно лақаб эрди Масъуд анга,  
Кириб тушга бир кеча Маҳмуд анга,

Ўғулға ажаб навъ қилди зухур,  
Бошидин-аёғигача ғарқи нур.

Бўлуб турфа боғе анинг маскани,  
Дема боғким, равзанинг гулшани.

Дамо-дам фузунроқ нишоти анинг,  
Ошиб ҳар замон инбисоти анинг.

Зумурраддин оллида ҳавзеки, ақл  
Келиб ожиз авсофин айларда нақл.

Мудаввар келиб чархи ахзар киби,  
Суви лавну таъм ичра кавсар киби.

Қироғида ул ҳавзанинг бир дарахт,  
Солиб шоҳ уза соя андоқки баҳт.

Қилиб паст тубо қадин пояси,  
Хамул равза саҳнин тутуб сояси.

Яна равзанинг сабзаси заъфарон,  
Иси хасталар жисмидин заъфрон.

Тамошосидин кўзга ёруб чароғ,  
Муаттар бўлуб атри бирла димоғ.

Кўруб шоҳ Масъуд бу турфа ҳол,  
Ўпуб ер атосидин этти савол

Ки: «Султонлиғинг ичра неттинг экин  
Ки, бу навъ манзилға еттинг экин?»

Деди: «Ул замонким, жаҳондор эдим,  
Адолат қилур фикрида бор эдим.

Чекар чоғда Ҳиндустонға сипоҳ,  
Чу ул ноҳият бўлди оромгоҳ,

Дедим эмин ўлсун черикдин бу мулк,  
Ситамға узотур илиқдин бу мулк.

Мунодидин англаб бу ҳукмумни хайл,  
Манга бўлди сайр айламак сори майл.

Қилиб беша тавфига ҳар ён назар,  
Ки, ногаҳ бир эл сори солдим гузар.

Жазира аро неча уйлук киши,  
Келиб заъф ила ажз аларнинг иши,

Йиғочу қамишдин ясада хонумон,  
Ани сандалу зарҳал айлаб гумон.

Уй ичра гилем ўрнида бўрё,  
Келиб боғу бўстон бузуқ кўрё.

Ўтар чоғда наззора айлаб муни,  
Етишти қулоғимға мазлум уни.

Ҳамул ун била марқаб эттим равон,  
Чу эттим, ажузе эди нотавон.

Бузуб кўрёсин черикчи кириб,  
Уйидин неча шоҳ ўтун ойириб,

Ўтунни уйидин чиқорғон замон,  
Солиб тўбра ичра доғи сомон.

Яна бир аёғ ҳам олиб бадсигол  
Ки, ул зарф бор эрди яшил сафол.

Буларни олиб золими тундхў,  
Чиқарда йўлукти манга рўбарў.

Жадал айлабон додҳоҳи била,  
Келиб ул ики-уч гувоҳи била.

Чу билдим аниңг зулму яғмосини,  
Иёсига қайтардим ашёсини.

Яна кўрёсини найбаст этиб,

Не айрилғонин борча пайваст этиб.

Дедим, боғлабон золим илгини руст,  
Осиб бўғзидин ул уй оллида чуст.

Чу ашёсини олди золи нажанд,  
Ҳамул дам сипаҳ сори сурдум саманд.

Мен этган замон тарки дори ғуур  
Ки, бўлди мақомим бу дори суур.

Ниҳоятсиз эрди гуноҳим менинг,  
Бу иш бўлди охир паноҳим менинг.

Хитоб ўлди, к-ей осийи боргоҳ  
Ки, умрунгда қозғонмадинг жуз гуноҳ.

Неча ҳаддин ортуқ гунаҳкорсен,  
Томуғ шуъласиға сазоворсен.

Ҳамул адлким тутти сендин вужуд,  
Гуноҳинг боғишиланди буду набуд.

Вале ҳар не иш қилғонинг беғараз  
Топибдур бу оламда бир-бир эваз.

Тузаттинг чу ул золға қўрё,  
Йўқ эрди бу феълингда рўю риё.

Анинг муздидур бу риёзи биҳишт,  
Ели мушксо, гарди анбарсиришт.

Ики шоҳ ўтунким, ани олди зол,  
Ерур музди бу нахли тубо мисол.

Яшил зарфким, айладинг рад анга,  
Еваздур бу ҳавзи зумуррад анга.

Етаклик сомонинки олди ажуз,  
Еваздур анга заъфарон бирга юз.

Қатил этганинг золими шумни  
Ки, қутқординг ул хаста мазлумни.

Анинг музди бўлди ҳаёти абад,  
Мақосидга йўқ бу ҳаёт ичра ҳад.

Бу савдодин ар воқиф ўлса киши.  
Қачон адлдин ўзга бўлғай иши.

Агар адл оламда тутмас вужуд,  
Пушаймонлиғ этмас бу оламда суд.

Сангаким бу соат эрур дастрас,  
Бу иш касбидин тинмоғил бир нафас.

Дамеким, шаҳ ўз адлидин фард эрур,  
Анга ул даме бедаво дард эрур.

Чу Масъуд уйғонди ул уйқудин,  
Фароғат топиб хотири қайғудин.

Адолат тариқин шиор айлади,  
Ато буйруғин ихтиёр айлади.

Қаю шаҳки адл этса Масъуддек,  
Не тонг Ҳақ насиб этса Маҳмуддек.

## XXII

### ҲИКМАТ

Искандарнинг Арастудин саволи ул бобдаким, адолат натижаси не навъ ишлар бўла олғайким, ул натижа умидига киши ул йўлға қадам солғай ва Арастуға жаҳонкушойлик тили очилмоқ ва адл натижаси жаҳонгирилик эркинин событ қилмоқ ва одилға ул жаҳон саодати ҳам топилмоқ

Яна шоҳ Арастуға қилди хитоб  
«Ки, эй донишойину ҳикматмаоб!

Шаҳеким эрур адлнинг жозими,  
Не ишлар экин адлнинг лозимиғ»

Деди: «Шаҳки адл ўлса ойин анга,  
Мусаххардуур дунёю дин анга.

Бу оламда бўлмоғлиқ оғоқгир,  
Яна олам аҳлида жаннатсарир.

Бу олам олурни бурун шарҳ этай,  
Яна ўзга оламға доги етай.

Шаҳеким анга адл бунёд ўлур,  
Натижа буким, мулки обод ўлур.

Чу мулк ўлди ободу халқи ғани,  
Яқиндорки, маъмур ўлур маҳзани.

Чу маҳзанни бу навъ маъмур этар,  
Сипохиға бешак мавожиб этар.

Сипохи қачон шаҳға толиб келур,  
Адусига, шак йўқки, ғолиб келур.

Қачон бир адусини паст айлади,  
Анинг мулкини зердаст айлади.

Ики мулк афзун қилур қувватин,  
Яна хасмининг синдуур шавкатин.

Бу тартиб ила чунки тарҳин солур,  
Ажаб йўқ, агар даҳр мулкин олур.

Яна улки чун адли зоҳирдуур,  
Бори қавм ила хайли шокирдуур.

Сипоҳийси гар тиф ураг беадад,  
Раият дуо бирла айлар мадад.

Қачон қилди минг хасми кинҳоҳ ўқи,  
Ярим кеча қилғонча бир ох ўқи.

Яна улки чун адл бўлмиш фани,  
Аду хайли доғи тиларлар ани.

Раоёси тунлар илик очибон,  
Сипоҳийси бориб анга қочибон.

Бирор топса бир ишга мунча сабаб,  
Жаҳонгир бўлмоғлиғи не ажаб?

Бу бир муддао чунки топти вуқъ,  
Яна бирга эмди қилойин шуруъ.

Бирор Тенгрига илтижо келтуруб,  
Чу адл амр қилмиш бажо келтуруб.

Олиб мулкидин ранжу фарсадалиқ,  
Халойикқа еткургай осудалиқ.

Тааммул қилиб адлу эҳсонига,  
Дуо қилса оғоқ эли жонига.

Натижа мунга ғайри ғуфрон эмас,  
Жазойи амал бўлмай имкон эмас.

Бу олам доғи бўлди, ул ҳам анга,  
Ики кавн мулки мусаллам анга».

Чу хатм этти донои бисёрдон,  
Жавобини топти шаҳи кордон.

Ҳаким айтудин чу касб этти нафъ,  
Бори шубҳаси кўнглидин бўлди рафъ.

## XXIII

Искандар ишларининг тафсилини ижмол била дейилмак ва ул ижмолнинг мужмалотин тафсил қилмоқ ва Доронинг расули анга олтун байза тилай келиб, пўлод найзадек итик сўзлар жавоб топиб бормоқ ва ул синон ламъасининг барқи анинг хирмани сабриға ўт солмоқ ва кунжуд била гўй ва чавгон йибормаги ва Искандар ул чавгон била гўй уруб кунжудни қушлар термаги

Бу янглиғ деди мўбади нуктасанж1,  
Ки, тарих илмиға кўп чекти ранж.

Ки, чун қилди ул шоҳи навхоста,  
Адолат била мулкин ороста.

Ҳаким, ўйлаким кўргузуб эрди йўл,  
Адолат ҳавосин билиб эрди ул.

Ки, олам олурға бўлур мунаҳаҳи,  
Бу сўз фикрида хотири огаҳи.

Тааммул қилур эрди ҳаддин фузун,  
Чекар эрди андиша торин узун.

Чу адлу шижиоат анга ёр эди,  
Яна рой ила ҳикмати бор эди.

Қуёшдек сипеҳр узра тортиб алам,  
Юруб олди олам юзин яққалам.

Ул ишларки ул қилди оғоқ аро,  
Киши қилмади бу куҳан тоқ аро.

Бу аъжубаларким анга берди даст,  
Жаҳондорлар қадри топти шикаст.

Неким қилди ул деса, айтай, киши,  
Туганмас ўқуб қарнлар ул иши.

Бори қилғонин демак осон эмас,  
Деганга тутатмаклик имкон эмас.

Муносиб бу келдики ҳар ҳол ила,  
Десам, аввал ахволин ижмол ила

Ки, комим раво айламиш бўлғамен,  
Ҳадисин адо айламиш бўлғамен.

Яна қиссасига тааққул қилиб,  
Таворихига кўп тааммул қилиб.

Умурида улча ғаройибдуур

Ки, ул ишта күпрак ажойибдуур.

Жудо айлабон кизб олойишин,  
Анга айласам назм оройишин<sup>2</sup>.

Хамоноки ул шохи давлатпанох,  
Бурун Рум тахтигаким бўлди шоҳ.

Мухолифқа қасди ҳалок айлади  
Ки, аъдодин ул ерни пок айлади.

Черик чекти андин сўнг истаб кушод,  
Жаҳон ичра айларга фатҳи билод<sup>3</sup>.

Бурун тортибон разм учун тифи кин,  
Юруб айлади азми Мағриб замин<sup>4</sup>.

Қилиб Зангбор<sup>5</sup> аҳлига чийралиқ,  
Юди тиф суйидин ул тийралиқ.

Яна бўлди Дороб била ҳамнабард  
Ки, бадҳоҳдин кўкка еткурди гард.

Яна мулк очмоқта қилмай даранг,  
Юруб фатҳ қилди билоди Фаранг<sup>7</sup>.

Чу бўлди мутеъ анда бўлғон улус,  
Кирим бирла фатҳ айлади Андалус<sup>8</sup>.

Ёниб Миср фатҳига қилди ситеz,  
Сипехр они Миср узра этти азиз.

Кўруб табъи ул марзни ошно,  
Қилиб анда Искандария бино.

Чу Зардушт<sup>9</sup> дафъига қилди ғулу,  
Алар ўтига тиф ила урди сув.

Ироқи Ажам сори қилғач хиром,  
Наво топти оҳангидин ул мақом.

Ироқи Арабға чу сурди саманд,  
Қудумидин ўлди ул эл баҳраманд.

Яна айлади азми Шому Ҳалаб,  
Насиб ўлди ул ерга кому тараб.

Яман сори чиқти нечукким Суҳайл<sup>10</sup>,  
Ақиқ ўлғали тошлари қилди майл.

Ер ўпмакка чун Макка азми қилиб,  
Қабули учун ул эшик очилиб.

Қилиб азм андин савоҳил сари,  
Қўюб юз ажойиб мароҳил сари.

Яна айлабон Форс фатҳиға азм,  
Муяссар бўлуб, айламай кину разм.

Очилғоч булар шоҳи фархундафол,  
Саодат била қилди азми Шимол.

Чу мулк олғали даъбу хў разм этиб,  
Таважжух била фатҳи Хоразм этиб.

Чекиб раъяти меҳри ишроқни,  
Ёруқ айлабон Даشتி Қифҷоқни.

Чу бу ноҳиятдин инонтоб ўлуб,  
Инонгири Сақсину Сақлоб ўлуб.

Чу озим бўлуб жониби Осу Рус,  
Бўлуб юzlари ваҳмидин сандарус11.

Тушуб Чаркасу Гурж12 сори йўли,  
Бўлуб борча гуржию чаркас қули.

Шимол аҳлин эҳсонға ғарқ айлабон,  
Таважжух қилиб азми Шарқ айлабон.

Чу манзил қилиб мулки Фарҳорни,  
Кесиб ул гулистонда ҳар хорни.

Чу маъбар бўлуб Мовараннаҳр анга,  
Ясолиб Самарқанддек шаҳр анга.

Чигил бирла Яғмодин айлаб убур,  
Нечукким, чамандин сабову дабур13.

Юруб Чинға бўлғонда маснаднишин,  
Камар боғлаб оллинда Хоқони Чин.

Яна Ҳинд сори қилиб турктоз,  
Бўлуб Кед қуллуқ била чорасоз.

Бузуб Ҳинду Чин ичра бутхоналар,  
Ясад тоат аҳлиға кошоналар.

Чу рафъ айлабон куфр янглиғ уюб,  
Бериб раҳнавардиға азми Жануб.

Ўтиб Синд ила Кечу Мукрон сори,  
Ҳам андин қилиб азми Кирмон сори.

Хүросон ҳавосида топқач ҳаёт,  
Ясаб анда шахре нечукким Ҳирот.

Сипохон сари дашт қилғонда тай,  
Бино айлабон шахре андоқки Рай.

Чу фатх ўлди оламдағи марзу бүм,  
Күнгүл жамъ этиб айлади азми Рум.

Нече вакт ўлуб айш ила жомгир,  
Күнгүл топмади анда оромгир.

Яна қатла оламни сайр айлади,  
Мамоликда бунёди хайр айлади.

Ғарыб ишларидинки йўқ анга ҳад,  
Бири эрди яъжуж оллиға сад.

Масоҳат қилиб борча оғоқни,  
Не оғоқким, чархи нух тоқни.

Чу қилди масоҳат масолик аро,  
Йиғоч этти таъйин мамолик аро<sup>14</sup>.

Танобеки, массоҳ қилди қулоч,  
Қилиб ўн ики минг қари бир йиғоч<sup>15</sup>.

Анинг саъидин топти бори сабил  
Нишоне қачон бир йиғоч ўлса мил<sup>16</sup>.

Манозилда тарҳи работ айлади  
Ки, андин мусофир нишон айлади.

Чу маъмурани тузди қилмай даранг,  
Тенгиз майли қилди, нечукким наҳанг.

Су узра суруб бениҳоят кема,  
Солиб анда бори кераклик нима.

Нече йил сув узра хиром айлади,  
Жазойирда гоҳи мақом айлади.

Ҳақ эҳсонидин баҳри зохир аро,  
Билодиким эрди жазойир аро.

Борин фатх қилди сув узра юруб,  
Бирин чун олиб, илгарирек суруб.

Чу ер қолмади олмоғон суда ҳам,  
Бу ишлар била бўлмай осуда ҳам.

Су мавжи киби изтироб айлади,

Мұхит ўртасыға шитоб айлади.

Чу бўлди ери нуқтагоҳи Мұхит,  
Қуий суву устун сипехри басит.

Қилиб сув тубин кўрмак андишае,  
Ҳамул ҳикмат аҳли ясаб шишае.

Кириб шишаға ранжу ташвир ила,  
Анинг оғзини беркитиб қир ила,

Танобеки, бўлғай неча минг қари,  
Ешилган, келур ҷоғда дарё сари.

Бир учин қилиб шиша давриға руст,  
Яна бир учин туттуруб элга чуст.

Бу янглиғ қилиб чўкти дарё қуий,  
Ани қаъриға чекти дарё суйи.

Ғаройибки дарёда бўлғай ниҳон.  
Анга зоҳир ўлди жаҳон дар жаҳон.

Алардин раво айлабон комини,  
Кема ичра қўйди яна гомини.

Ва лекин бу сўзда эрур ихтилоф,  
Ерида демакдин эмасмен маоф.

Яна азм қилди қуруғлукқа бот,  
Чиқиб айлади азми оби ҳаёт.

Қоронқуда айлаб ёруғлук талаб,  
Ани топмайин қойтти хушклаб.

Қуруғлук аро Хизр ўлуб раҳбари,  
Тенгиз ичра Илёс эди ёвари.

Бу ишлар қилибким, киши қилмайин,  
Кишидин бу навъ ишлар айтилмайин.

Валоят қилиб Тенгридин мултамас,  
Нубувватқа доғи топиб дастрас.

Бўлуб онча давлат мұяссар анга,  
Яна онча кишвар мусаххар анга

Ки, сабтиға йўнса киши хомае,  
Керактур рақам топса «Шахнома»е.

Ва лекин бу дафтарда гунжойиши,  
Емас сиққудек борча оройиши.

Заруратдин алқисса ҳар ҳол ила,  
Анинг қиссасин сурдум ижмол ила.

Адо бўлди ҳар байт аро дафтаре,  
Ҳар уй ичра қилдим ниҳон кишваре.

Тамоми бу эрдики, қилдим адo,  
Вале эмди тавфиқ берса Худо,

Сунуб панжа куллий ише сори қўл,  
Қилай назмким, асл бўлғай ҳамул:

Алардин бири эрди Доро иши  
Ким, ул навъ иш ёд бермас киши.

Бу навъ эрди ул ким малик Файлақус  
Ки, Рум ахли эрди анга хокбўс.

Жаҳонхусрав ул чоғда Доро эди,  
Анга шоҳлиғ ошкоро эди.

Каёнийлар ўрнида оғоқгир,  
Келиб пушт-барпушти соҳибсарир.

Умурида ойини Лухросбий,  
Сипоҳида қонуни Гуштосбий.

Бўлуб кўп Каёний иш ихдос анга,  
Тегиб Баҳманий мулк мерос анга.

Жаҳонбонлиғ амрида Хусравнажод,  
Ангачаки Кайхусраву Кайқубод.

Жаҳон мулкида мустақил подшоҳ,  
Анга топшуруб шоҳлар тожу коҳ.

Мамоликда ҳар соҳиби тахту тож,  
Анга еткурууб пешкаш, ё хирож.

Бири Файлақус эрди ул хайл аро,  
Хирожини бергучи bemожаро.

Хирож ул нимаким муқаррар эмиш,  
Ҳамоноки минг байзаи зар эмиш.

Чу ул қилди дайри фанодин хиром,  
Скандар анга бўлди қойим мақом.

Бор эрди чу мулк ўлди тайин анга,  
Бу янглиғки шарҳ эттим ойин анга.

Ҳам аввалғи йил тортибон тифи кин,  
Қилиб Занг шоҳи била бифи кин.

Топиб тифининг барқи чун иштиол,  
Куюб занги андин нечукким зугол 17.

Тўкуб эрди қон онча ул хайлдин  
Ки, занг аҳли рухсори ул селдин,

Қаро доғлардек бўлуб ошкор,  
Бўлуб ер юзи, ўйлаким лолазор.

Ики-уч йил ичра неча бўйла разм,  
Қилиб эрди ул шоҳи фархунда азм

Ки, борида аъдоси манкуб эди,  
Кириб илгига улча матлуб эди.

Бу фурсатда фатҳ айлаган марзу бум,  
Бўлуб ики-уч ончаким мулки Рум.

Қилиб хайлин аъдоға андоқ далер  
Ки, бўлғай қулон қасдида нарра шер.

Шукухи ошиб баҳри заҳхордин,  
Ливоси ўтуб ҷарҳи даввордин.

Қилиб тифи барқи жаҳонсўзлук,  
Юзи машъали оламафрузлук.

Хаёли аро урмайин тобу печ,  
Жаҳонгирлик фикридин ўзга ҳеч.

Не офоқни ўзига кенг кўруб,  
Не офоқнинг шаҳларин тенг кўруб.

Атоси вафотидин уч йил ўтуб,  
Иши лек ўн онча рифъат тутуб.

Бу уч йил аро кўнглига етмайин,  
Хаёлиға балким хутур этмайин

Ки, Дороға бўлғай иши эҳтиёж,  
Анга худ не этгайки, бергай хирож.

Бировким азалдиндуур рифъати,  
Ўзидек рафеъ-ўқ эрур ҳиммати.

Буким бўлғуси хасм Доро анга,  
Керак зоҳир этмак мадоро анга.

Ва ё мулку жоҳиға қилмоқ назар,

Анинг кўнглига мутлақ этмай гузар.

Қачон қилсалар кин ики нарра шер,  
Яқинким, бўлур навжувонроқ далер.

Қачон кин чоғи бўлғай андешаси  
Ки, кўпракдуур хасмнинг пешаси.

Ики аждаҳо бўлсалар кинасанж,  
Тафовут не, кўпрак эса ерда ганж.

Тенгизда балиғ бўлса ҳаддин улуғ,  
Наҳанг ўлмас осебидин қайгулуғ.

Скандаргаким ёвар афлок эди,  
Бисот ичра ҳар кун тарабнок эди

Ки, Доро қошидин етишти расул,  
Анинг остонига қилди нузул.

Парастандалардин чу бор истади,  
Ани оллиға шахриёр истади.

Қадам урғоч-ўқ кўрди чун шоҳни,  
Супурди юзи бирла даргоҳни.

Парастандалиқ расми чун соз этиб,  
Сўзига дуони сарогоз этиб.

Дуоеки, бўлғай сазовор анга,  
Жулус амри айлаб жаҳондор анга.

Чу ўлтурди қосид тикиб ерга кўз,  
Не ёро анга сурмайин дерга сўз?

Скандар шукухи қилиб лол ани,  
Қаю лолким, дангу беҳол ани.

Қилиб шоҳ андин бу маънини фаҳм  
Ки, фаррӯ шукухи анга солди ваҳм.

Сўз айтиб, анинг сори солмай кўзин,  
Анга тегруким, топти қосид ўзин.

Кўнгул босқонин чунки фаҳм этти шоҳ,  
Савол этти шоҳона айлаб нигоҳ

Ки: «Доро шаҳи комрон хушмудур?  
Анга мулк ойини дилкашмудур?»

Кўпуб, ер ўпуб берди қосид жавоб,  
Яна комкорона қилди хитоб

Ки: «Бу навъ келмакта комингни айт,  
Неким деди Доро паёмингни айт!»

Яна ер ўпуб қосиди раҳхиром,  
Деди: «К-ей шаҳаншоҳи олиймақом,

Чу сўрдунг сўзумни, эрур ногузир  
Ки, бўлғаймен оллингда фармонпазир.

Ҳамоно бурунроқ малик Файлақус  
Ки, Рум андин ўлмиш эди навъарус,

Қилиб эрди минг байза ҳар йил қабул,  
Зари мағрибийдин топарға вусул.

Бўлуб эрмиш уч йилки ул комёб,  
Бўлубтур биҳишт ичра оромёб.

Бу уч йилғи тақсим топқон хирож  
Ки, андин эди дўстлуққа ривож.

Магар шоҳ девонига кетмамиш,  
Етар маҳзан ичра магар етмамиш.

Менинг келганимдин бу эрди мурод  
Ки, гар лутф этиб шоҳи олийнажод,

Ани берса, айлаб ҳисоб, элтайин,  
Йўқ эрса, не айтур жавоб – элтайин».

Скандарга келди бу сўз бас қатиғ,  
ғазаб заҳридин коми бўлди ачиғ.

Юзи ранги кўргузди ўтдин нишон,  
Бўлурга жаҳон ичра оташфишон.

Яна лаҳзасе бошин айлаб қуи,  
Ҳамул ўт уза урди ҳикмат суйи

Ки, ифроти ҳилму камоли хирад,  
ғазаб хайли андешасин қилди рад.

Кўтарди бошин сўзга оғzin очиб,  
Жавобиға онинг жавоҳир сочиб

Деди: «Айт Дороға мендин салом,  
Салом айтқач бўйла еткур паём

Ки, шаҳлиқки, йўқтур бақоси аниңг,  
Емас жуз фано интиҳоси аниңг.

Бугун-тонглалиғ умр учун күрма ранж  
Ки, қўйгайсен албатта ганж узра ганж.

Хазойинки йиғдинг ададдин фузун,  
Санга ранж текурди ҳаддин фузун.

Буким йиғдинг, аввал топ андин асиғ,  
Қачон топсанг андин асиғ, ўзга йиғ.

Ишеким зарар нафъидин бўлса кўп,  
Емас қилмоғи ақл оллинда жўб.

Санга нафъ йўқ, бизга андин алам,  
Ўзунгга етурма алам, бизга ҳам.

Тилаб байза кўп бўлма меҳнатқа тўш,  
Ҳаво тутти ул байза бергучи қуш18.

Агар табъинг ўлди насиҳатпазир,  
Емас бизга ҳам дўстлукдин гузир.

Ва гар панд қўнглунга йўқ судманд,  
Сўзунг бизга доғи эмас дилписанд.

Бошингдин бу беҳуда савдони қўй,  
Хаёлингдин ушбу таманнони қўй.

Ангаким эрур нуктадону зариғ,  
Улуғ ишдуур тонимоғлиқ ҳариф.

Санга нотавонлар била тушти иш,  
Менингдек киши бирла иш тушмамиш.

Гуруҳеки, ҳар йил олурсен хирож,  
Сотибсен аларға бирор эски тож?

Хирож олмоқ андин эмас дилпазир  
Ки, ҳам тожбахш ўлса, ҳам тахтгир.

Наҳангеки баҳр ичра бебок эрур,  
Гар ул сувда юз минг дурри пок эрур.

Не навъ ўлғай андин хирож истамак,  
Сувда дурри кўп бўлса бож истамак.

Бу янглиғ таманнони қилғон базе,  
Ўзин сувда қилди балиғ туъмаси.

Хирадмандлиғ келди хурсандлик,  
Кулайсиз тاما нохирадмандлик.

Чекиб бежиҳат бўйла хориж наво,

Аромизда кўрма хусумат рано.

Гумон этмаким, молу жоҳинг сенинг,  
Иш ўлғонда бўлғай паноҳинг сенинг.

Дема ер кўтармас ададсиз черик,  
Санга тифим оллинда тутқай илик.

Санга кўп, манга озроқ эрса сипоҳ,  
Ерур бергучи озу кўпга Илоҳ.

Керак дастгир ўлса давлат иши,  
Йўқ эрса нетар кўп черикни кишиғ»

Тугатгунча сўзни шаҳи нуктагӯ,  
Маҳобат эшитгучини қилди сув.

Қўпуб қосиди нотавон тутти йўл,  
Вале не тирик, не ўлук эрди ул.

Солиб тезрак ҳар нафас гомни,  
Чу Дорога еткурди пайғомни.

Жавобини Доро эшитгач тамом,  
Тағайор топиб, бўйла сурди калом

Ки: «Ҳар кимга бу навъ афсонадур,  
Тасаввур килурменки, девонадур.

Ва ё маст эркинки, бу сўзини  
Деган чоғда билмайдурур ўзини.

Ва ёхуд эрур тифли беақлу рой  
Ки, эрмас сўзида хирад раҳнамой».

Чу бу нукталардин савол айлади,  
Равон мустамеъ шарҳи ҳол айлади

Ки: «Не телба фаҳм эттим они, не маст,  
Худ эрмас яна тифли ғафлатпарам.

Ерур ҳам хирад ёру ҳам ҳушманд,  
Ҳадиси рафеъю жаноби баланд.

Бўлуб илму ҳикматқа ҳамдаст ҳам,  
Диловарсифатдур, забардаст ҳам.

Не ҳожат сифотин баён айламак,  
Бўлур сўзларидин аён айламак.

Шукуҳи била фарридин ҳеч аҳад,  
Топа олмай оллида сўз дерга ҳад.

Нечаким назар айласам ҳар сари,  
Анинг фикри эрмасдуур сарсари».

Бу сўз қилди Дорони ул навъ тунд  
Ки, бўлди ажал тиги оллинда кунд.

Ғазаб ўтини айлади шуълахез  
Ки, тушти фалак жавфида рустахез<sup>19</sup>.

Ул ўт қўзғалон солди даврон аро,  
Не даврон аро, чархи гардон аро.

Буюрдики, қосидни банд эттилар,  
Сияҳчол сори олиб кеттилар.

Деди: «Гўдаги бандазодам менинг,  
Жанибаткаши хонаводам менинг.

Ҳам обоси бу хонадон бандаси,  
Ҳам аждоди аждодим афкандаси.

Назар айласам ақл мезонига,  
Ким ўлғайки, киргай киши сонига?

Ки, онинг сўзин сўз ҳисоби тутуб,  
Ва ё мен деган сўз жавоби тутуб.

Тузуб шарҳ айларда дебочае,  
Ясаб баҳр оллинда дарёчае.

Не мендин таваҳҳум, не элдин ўёт,  
Бу ғоятқа шарҳ этгай андин сифот.

Анинг дафъи асбобин энг тузай,  
Анга ул ким эрконлигин кўргузай.

Берай гўшмолеки, ҳар бадсигол,  
Тузалгай чу ёд этгай ул гўшмол»<sup>20</sup>.

Забоноваре аввал истатти чуст,  
Демакта далеру адоси дуруст.

Анга сўзлар айтиб итик досдек,  
Итик досдек йўқки, олмосдек.

Яна берди чавгону гўе анга,<sup>21</sup>  
Қилиб мунда ҳам гуфтугўе анга.

Яна бир идиш кунжуди беҳисоб  
Берив, анда ҳам қилди сўзлар хитоб.

Узотиб ани тикти йўлиға кўз  
Ки, то не кетургай жавобиға сўз.

Чу ул етти қатъи масофат қилиб,  
Қизил тилни бошиға офат қилиб.

Скандарга арз этти аҳли вусул  
Ки: «Доро қошидин келибдур расул».

Деди шаҳки, қосидни келтурдилар,  
Қаро ерни гардунға еткурдилар.

Скандарга чун тушти қосид кўзи,  
Унут бўлди оғзида айтур сўзи.

Шукуҳи анинг жисмидин олди тоб,  
Виқори солиб кўнглига изтироб.

Ер ўптию арзи дуо айлади,  
Рисолат тариқин адo айлади.

Деди шаҳки: «Арз эт сўзунг борини,  
Баён қил, хаёлинг намудорини!»

Деди ҳомили роз айлаб сужуд  
Ки: «Жонингға Ҳақдин туман минг дуруд<sup>22</sup>.

Йўқ оллингда сўз дерга ёро манга,  
Вале дей, деган сўзни Доро манга.

Не сўзким демиш ул десанг, арз этай,  
Десанг йўқ, қаёндинки келдим, кетай».

Скандар замираға солди билик  
Ки: «Бордур кетурган каломи ирик».

Дедиким: «Паём этти Доройи даҳр,  
Адолат била кишваройи даҳр,

Ки, расми қадимийки, дерлар хирож,  
Ки, йўқ бизга олмоққа худ эҳтиёж.

Вале шоҳларким, эрур бандамиз,  
Не ҳукмеки қилсоқ сарафкандамиз.

Муни бермак – изҳори тоатдуур,  
Бизинг ҳукмумизга итоатдуур.

Отонгға замонеким, эрди ҳаёт,  
Бу хизмат аро зоҳир этти сабот.

Чу сен топтинг онинг мақомиға йўл,

Керак қилсанг эрди, неким қилди ул.

Итоат тариқин шиор этмадинг,  
Неким қилди ул, ихтиёр этмадинг.

Ики-уч йил ўттию ул етмади,  
Киши ҳам ани бозжуст этмади.

Чу иш ҳаддин ўтти йибордин киши  
Ки, бўлғай хирож олмоқ онинг иши.

Демишсен неча сўзки, ҳаддинг эмас,  
Киши билса ҳаддин, сўз андок демас.

Вале невчунким, кичикдур ёшинг,  
Тўқунмайдурур тошқа ҳаргиз бошинг.

Дедукким, жунунунгға оғоз эмиш,  
Жаҳолат санга кўпу ақл оз эмиш.

Ишингга йўқ ислоҳ тадбирдин,  
Чу гўдаксен, ўттук бу тақсирдин.

Керак эмди хизматни ноком этиб,  
Не важҳеки қолмиш саранжом этиб.

Олиб, қилмайин ваҳм, азм этгасен,  
Рафеъ остон ўпгали етгасен.

Юзунгдин доди рафъ бўлғай ҳижоб,  
Иноят доди қўргасен беҳисоб.

Агар ваҳмдин изтироб айласанг,  
Деган амрдин ижтиносидур айласанг

Ва ё бўлса тугёни жаҳлу ғуурур  
Ки, сўз радди зотингга келса зарур

Ки билмаслигинг ибтидосидур ул,  
Кичик ёшлигинг иқтизосидур ул.

Йибордин қошингға муносаб нима,  
Бўюн тўлгама, номуносаб дема!

Кетурди, бу сўзни дебон нуктагўй  
Аро ерга бир савлажон бирла гўй

Ки, гўдаклигинг чунки ғолибдуурур,  
Санга гўю чавгон муносабдуурур.

Будурким, қўрунгай санга қўзга иш,  
Ва лекин эрур мулк иши ўзга иш.

Ва гар рафъ қилмай қүнгүлдин хилоф,  
Аён қилмасанг ажзинга эътироф.

Низоъ ўлғон ўлса муаккад санга  
Ки, худ йўқ ул андешаға ҳад санга.

Кўюб жаҳл, ўз жонингга раҳм қил,  
Сипоҳим ҳисобин бу кунжудча бил».

Дебон, қўпти мажлисдин айлаб шитоб,  
Улуғ зарф аро кунжудди бехисоб

Кетурдию оғзидин очти тугун,  
Бисот ичра ул зарфин этти нигун,

Деди: «Шоҳдин ҳар ким этса ҳарос,  
Сипоҳин бу кунжуддин этсун қиёс».

Тугатгач сўзин нуктагўйи далер,  
Жавоб истаю, кўз тикиб бокти ер.

Чу қосид бу янглиғ такаллум қилиб,  
Скандар ниҳоний табассум қилиб.

Тугатти чу хориж таманно била,  
Скандар сўз очти таанно била

Ки: «Доройи даврон шаҳи покзод  
Ки, бермиш тариқи фасоҳатқа дод.

Ани сўз чу беихтиёр айламиш,  
Ажаб нукталар ошкор айламиш.

Буким шоҳларни демиш бандаси,  
Сарафроларни сарафкандаси.

Гуруҳеки ўз лутфи бирла Илоҳ,  
Аларни қилибдур улус узра шоҳ.

Киши ўзига банда қилмоқ хитоб,  
Ҳамоноки эрмас тариқи савоб23.

Алар қуллуғи Ҳаққа ойин эрур,  
Агар Тенгри, бандам, деса чин эрур.

Бу сўзким деди шоҳи дарёато,  
Шак эрмаски, бордур саросар хато.

Ерур ширк чун Тенгрининг ширкати,  
Кирап куфр йўлиға бу фикрати.

Яна улки, дебдур мени тифлу масть,  
Доғи телбалик қайдиға пойбаст.

Бу уч ишга бўлғай бирор муттаҳам  
Ки, чеккай сўзи қуфр сори алам.

Йўқ эрса ики шоҳи ҳашматматоъ,  
Аён этсалар мулк узра низоъ.

Бири бўлса фарзан улуғ, бир кичик,  
Бу сўз демас ўлса улуғда билик.

Қўтоннинг улуқ қуш аро сони бор,  
Вале сунғур оллинда не жони бор?24

Яна буки, шоҳ айлаб эҳсон манга,  
Йибормишдурур гўю чавгон манга.

Ерур мунда бир рамзи пўшида ҳарф,  
Тафаъул аро бениҳоят шигарф

Ки, ер ҳайъатин айлабон жустужўй,  
Мудаввар топибдурлар андоқки гўй25.

Чу шоҳ они тутти мусаллам манга,  
Ҳамоноки Ҳақ берди олам манга.

Буким илгима солди чавгонини,  
Мусаллам манга тутти майдонини.

Ҳамоно чиқиб мулк майдонидин  
Мени баҳравар қилди чавгонидин

Ки, то мен бу майдонда гўй урғамен,  
Самандим қилиб гармпўй урғамен.

Манга муждалар етти андин басе  
Ки, мамнунмен ул комрондин басе.

Бу кунжудки ҳам келди андин бу ён,  
Анинг доғи рамзини айлай баён:

Чу қилмиш сипоҳийға ташбиҳ ани,  
Ерур нуктае, ўйла танбиҳ ани.

Менинг хайлима келди қушлуқ сазо  
Ким, ул қушқа кунжуддин ўлғай ғизо».

Буюрдики, сурдилар онча товук,  
Ки кунжуд ҳисобиға бўлғай ёвуқ.

Алар келтуруб дона термакка зўр

Ки, бир дона ҳам қолмай элтурга мүр.

Бу диққатлар айлаб суханварни лол,  
Қаю лолким, ўлтуруб инфиол.

Буюрди равон шоҳи ҳикматқиёс  
Ки: «Бўл эмди Доро сари раҳшунос.

Ешиғтан жавобингни еткур анга,  
Не сўзларки сурдунг манга, сур анга!»

Ёниб қосид ул сўз хароши била,  
Аёғи келиб, борди боши била.

Чу Дорога билганларин қилди фош,  
Адоват ўти кўкка тегурди бош.

Қолиб фитна хайлиға аҳли замон,  
Адам кўйига қочти амну амон.

Аёқчи, кетур майки, тортай далер,  
Чу сархуш бўлай, гўкрай андоқки шер!

Кирай хасм аро, ўйлаким шери масти,  
Бориға берай бир дам ичра шикаст.

Муғаний, чолиб, гарм ҳангома туз,  
Сурудунгда оҳанги «Шаҳнома» туз.

Чу оҳанги кин эттилар икки шоҳ,  
Далер ўлсун ул нағма бирла сипоҳ.

Навоий, жаҳон ичра ошуб эрур,  
Фитан сарсари амниятрўб эрур.

Бу ошубдин гар тиларсен амон,  
Амон топма май шуғлидин бир замон.

Замон аҳлиға бўлса минг ибтило,  
Емас мубтало бода ичган тўло.

#### XXIV

Мухолафат мазамматидаким, «мух» ҳасад била «улфат» дуурур ва «мухл» андиша била «оғат» кўрунурки, аксин тутса, мусодақат юз берур ва таркин тутса, саодат сарманзилиға еткурур ва сойир эл мухолафати бобидаким, музиби хонумон хароблиғидур ва салотинға воқеъ бўлса, жаҳон хараблиғи

Жаҳон аҳлида йўқ вафо, эй рафиқ,  
Ерур рифқ1 алардин жудо, эй рафиқ!

Адоват била киндур ойинлари,  
Туганмас адоват била кинлари.

Жаҳон ичра мавжуд эрур неча хайл  
Ки, бориғадур кина қилмоққа майл.

Киши бўлмағай қилсанг андешае  
Ки, топилмағай анга ҳампешае.

Қачонким аён бўлди ҳамкорлик,  
Не имкон киши бўлмай озорлик.

Билур кимки бир пеша бўлғай фани  
Ки, албатта ҳампешадур душмани.

Бир ишта маҳорат чу зоҳир бўлур,  
Яна кимса ҳам анда моҳир бўлур.

Чу ҳар соридин бўлди даъвою лоф,  
Аро ерда солур таассуб хилоф.

Бўлур кин иковнинг тунию куни,  
Тилар бўлмағай – бу ани, ул муни.

Нединким бири бўлса туфроққа teng,  
Бу фанда қолур ер яна бирга кенг.

Ким ўлса бирор бирла ҳамфанилиғи,  
Жихат будуур бўлса душманлиғи.

Бу ёлғуз эмас аҳли санъат аро  
Ки, кўпракдуур аҳли давлат аро.

Шаҳеким анга бўлса юз минг киши,  
Будур борча бир чаргаликнинг иши.

Аларким, наёбатқа мансубдур,  
Тақаррублари шаҳға матлубдур.

Аларким, эрурлар аморатмаоб,  
Қилурлар наёбат учун изтироб.

Аларким, туман бўлди ойинлари,  
Аморат учундур бори кинлари.

Аларким, қўшунбеклигин қилди фан,  
Хароби буким бошлагайлар туман.

Ерур чун тафовут била ул асос,  
Асофилға тегру биҳозалқиёс.

Қаю чаргаким анда бир хайл эрур,

Бориға яна чаргага майл эрур<sup>2</sup>.

Қилур ҳар бири саъй етмак бурун,  
Ҳамул мақсади ичра топмок ўрун.

Таассуб чу солди ароды судоъ<sup>3</sup>,  
Яна ўртаға тушти кину низоъ.

Неча шоҳларға яқинроқ киши,  
Адоват келиб кўпрак онинг иши.

Асофилға ҳар нечаким жаҳл эрур,  
Ва лекин хусуматлари сахл эрур.

Зиёнин нечаким ёмон фарз қил,  
Бир ўзига, ё ўн ўзидекка бил.

Булардин авосит ародур ашад  
Ки, нуқсонлари фош ўлур беадад<sup>4</sup>.

Топар кўп киши ул адоватда бим,  
Бузулур басе хонадони қадим.

Бурунғи ариғ этса тошмоққа майл,  
Икинчи эрур поя боронға сел.

Ва лекин аолийға тушса хисоб  
Ки, бўлғай салотин гардунжаноб.

Бу гўё жаҳон ичра тўфон эрур  
Ки, андин жаҳон аҳли вайрон эрур.

Не тўфон, бало баҳри чайқолгони,  
Жаҳон аҳли сув остиға қолғони.

Агар дашту тоғ узрадур ҳар фарик,  
Қилич баҳри суйига бўлмоқ ғарик.

Жаҳон мулкидин амн бўлмоқ йироқ,  
Амонлик ҳамул мулк элидин кироқ.

Бало селининг бўлмоғи мавжзан,  
Чўмурмоқ улусни бу мавжи фитан.

Не тўфон, бедоду селоби ғам,  
Ерур ончаким даҳр элига алам.

Адоватқа боғлаб камар икки шоҳ,  
Жаҳон аҳлини айлаб икки сипоҳ.

Бори тортибон қатл учун тифи тез,  
Қилиб тифи тез ўлтууррга ситеz.

Ато бир тараф гар эрүр, фильмасал,  
Яна жониб ўлса ўғулға маҳал.

Икисига кин ўти солғай ғазаб,  
Ул ўт қон ичарга қилиб ташналаб.

Ато жон беріб ўғлин ўлтурғали,  
Ўғул ҳам анга тиғи кин сурғали.

Қариндош топса қариндошини,  
Дамо-дам тилағы кесгали бошини<sup>5</sup>.

Тушуб ошноларға бегоналиқ,  
Кетіб ҳамнишиналарға ҳамхоналиқ.

Бу навъ ўлса мундоқ ики зот аро,  
Не бўлғай, гумон қил ики ёт ароғ

Анингдек эсиб тундбоди набард  
Ки, ошубдин етқуруб кўкка гард.

Тутуб фитна гарди халойиқ кўзин  
Ким, ул гард аро халқ топмай ўзин.

Солиб элга мундоқ набарди бало,  
Гаҳи қатлу торожу гоҳи жало.

Агар бу ики шаҳға бўлмай масоф,  
Ва лекин бўлуб бўйла дойим хилоғ.

Улусқа деган янглиғ аҳвол ўлуб,  
Халойиқ ҳаводисқа помол ўлуб.

Ва гар раҳм қилмай улус жониға,  
Азимат қилиб разм майдониға,

Бирисин зафар айлабон чирадаст,  
Яна бир сори зоҳир ўлса шикаст.

Яқин билким ул кундур оғат куни,  
Не оғат куниким, қиёмат куни.

Хушо, ики озодаи номурод  
Ки, бир-бирга зоҳир қилиб иттиҳод.

Не ул айласа бу мадоро қилиб,  
Анга ҳам бу рифқ ошкоро қилиб.

Анинг коми бу бирга мақсуд ўлуб,  
Мунунг радди ул бирга мардуд ўлуб.

Рафиқ ики дарвеш, беиштибох,  
Ерур яхшироқким, адув ики шоҳ!6

XXV

Ики жаҳондор мухолафатидин жаҳон аҳли хирманига бало барқи етгани ва ики ёр  
мувофақатидин ул туташқон ўтқа раҳмат ёмғури ёғиб, шуъласин паст этгани

Эшиттимки, Чингизу1 Хоразмшоҳ,  
Адоватқа чун бўлдилар кинаҳоҳ.

Бузулди жаҳон улча мақдур эрур,  
Нетай шарҳин айтиб, чу машҳур эрур.

Ҳамоноки Чингиз топиб зафар,  
Анинг мулкини қилди зеру забар.

Не кишвар ароким мақом айлади,  
Чекиб тифи кин, қатли ом айлади.

Тушуб мавжға баҳри жабборлиқ,  
Аён айлабон мавжиги қаҳҳорлиқ.

Ато ўғлиға йиғлабон: ҳой-ҳой!  
Қизиға ано тортибон: вой-вой!

Ҳаёт уйига марг солиб халал,  
Амон раҳнасин маҳкам айлаб ажал.

Магар Шом мулкида эрди бу ҳол  
Ки, ики рафиқи маваддатхисол.

Қазодин бирор дастгири бўлуб,  
Бирор йўқки, коғир асири бўлуб.

Кўзидин оқар қонларидин иков,  
Юдилар илик жонларидин иков.

Тилаб ҳар бири айламак ибтидо  
Ки, жонин яна бирга қилғай фидо.

Бу ҳолатда қотил чекиб тифи қатл  
Бирисига қилди аён биги қатл.

Яна бир бошин очиб, этмай ҳарос,  
Аён айлади ёлбориб илтимос

Ки: «Аввал менинг бошима тиф сур,  
Чу мен ўлдум, ул дам анинг бўйнин ур!»

Мунга чунки майл этти ўлтурғали,

Бошиға жафо тифи текургали.

Очиб бошин ул бир ҳам айлаб ҳавас,  
Неким эрди аввалғиға мултамас.

Булар ҳар бир – ул бир учун қайғуда,  
Бу ҳолатда Чингиз эмиш уйқуда.

Тушига кирап бу икки ёр иши,  
Муни күргач айтур анга бир киши

Ки: «Кечгил халойиққа озордин,  
Вафо ўрган ушбу ики ёрдин.

Санга кинавар бўлса Хоразмшоҳ,  
Ул иштин жаҳон аҳлиға не гуноҳ?»

Ики шаҳ кини жаҳонни бузуб,  
Ики зор мундоқ вафо кўргузуб.

Чу уйғонди уйқусидин қаҳрамон,  
Ўлумдин халойиққа берди амон.

Ики ёру қотилда ул можаро  
Ки, ом ўлди баҳшиш сўзи халқ аро,

Қилиб эрди коғирға доғи асар,  
Етишти қулоғига чун бу хабар.

Қилиб рафъ кўнглидин озорни,  
Ешиб қилди озод ики ёрни.

Ики шоҳ чун бўлдилар кинаҳоҳ,  
Жаҳон аҳли бўлди саросар табоҳ.

Вале ики дарвешнинг химмати,  
Мувофиқлиғи юмни хосияти

Ки, қилдилар исор жони ҳазин,  
Кўтарди жаҳон аҳлидин тифи кин.

Киши айласа рифқ юмнин ҳавас,  
Анга то абад ушбу тамсил бас2.

## XXVI

### ҲИКМАТ

Искандарнинг Арастудин саволи ул бобдаким, мухолафатки борча милалда мамнұйдурур  
ва низоъки борча маҳалда номасмуъ, андоқ модда топилғаймуқим, анда дилпазир бўлғай  
ва қилмоғи ногузир ва Арасту ул тийралиқда ёруғлуғ қўргузмак ва ул мухолиф оҳангни  
ростда тузмак

Яна сўрди шоҳи Фаридунҳашам<sup>1</sup>  
Ки: «Ей ҳикмат аҳлиға ройинг ҳакам!

Ики кимсага воқеъ ўлмоқ низоъ,  
Бир ишта эрур мумниноъ.

Низоеки, ҳар кимга масмуъдур,  
Хирад буйруғи бирла мамнуъдур.

Топилғайму ул навъ бир жоддае,  
Ҳамул жодда ичра бир моддае

Ки, бўлгай низоъ анда хотирписанд  
Ки, гар бўлмаса бўлгай андин газанд»

Деди ҳикматойини донанда<sup>2</sup> ҳарф  
Ки: «Қилдинг саволе бағоят шигарф.

Низоеки қилди хирад они рад,  
Қабул этти ҳам баъзи ишда хирад.

Бирорда бир иш бўлса нодилпазир,  
Ки, фоилғадур қилмоғи ногузир.

Вале элга андин зараптур басе,  
Анинг зимнида шўру шардур басе.

Бирор манъиға гар топар дастрас,  
Ўзин тутса маъзур, маъзур эмас<sup>3</sup>.

Ва гар манъ қилдию ер тутмади,  
Не иш таркиниким бу дер, тутмади.

Билиндики, кўп табъи роғибдуур,  
Ирикрак анинг манъи вожибдуур.

Мунунг бирла ҳам топмаса имтиноъ,  
Бўлур вожиб ул лаҳза қилмоқ низоъ.

Бўлур чун низоъ ичра нуқсону суд,  
Керак анда бир шарт тутса вужуд

Ки, буқим низоъ ичра тузди асос,  
Ўзин айласа хасм бирла қиёс.

Агар ғолиб ўлмоғлиғин чоғласа,  
Низоиға ул лаҳза бел боғласа.

Ва гар қувватин англаса байн-байн,  
Арода падид этмаса шўру-шайн.

Ва гар худ ўзин билса мағлубдур,  
Насиҳат била иктифо хўбдур.

Керак ул насиҳат доғи нармрўй  
Ки, то мустамиъ бўлмағай тундхўй.

Ки тунд ўлса кўп ваҳшат имкони бор  
Ки, носиҳқа ҳам бим нуқсони бор.

Низоъ ичра мундоқ маротибни бил,  
Қила олмоғинг чун яқин бўлди қил.

Яқин бўлмаса ғолиби зан керак,  
Киши барча ишта хирадфан керак.

Бироқим хираддур анга раҳнамун,  
Бу ишларда қўймас бўлурға забун».

Чу ноғиъ жавоб англади мустамиъ,  
Яна сўрмади сўз – бўлуб мунтафиъ.

## XXVII

Доронинг Искандар сўзидин ошуфта бўлуб, сипоҳ йифмоқтин оламға ошуб солиб, олам-  
олам черик йигиб Искандар размиға азм қилғони ва Скандар ҳам ул дарёйи оғат  
муқобаласида сели бало ва кўхи маҳофат муқоталасиға барқи разм ва вағо ясаб юзлашгани  
ва оғоқни ул ики шоҳ зеру забар килурда Доронинг ливоий давлати ўзга сарсар оғатидин  
сарнигун бўлуб Искандарнинг маҳчак алами қуёш ливосидин ўтгани

Ики шоҳ ишида хикоятгузор,  
Бу янглиғ берур сўзга зеби узор

Ки, Дороға чун етти борғон расул,  
Скандар қазоёсига берди тул.

Қаю сўзки шаҳдин хитоб айлади,  
Неким истимио жавоб айлади.

Чу арз айламақдин йўқ эрди гузир,  
Борин айлади арз фармонпазир.

Чу фаҳм этти Доро анингдек жавоб,  
ғазаб ўтидин жисмиға тушти тоб.

Ёнар ўтдек ўлди қадам то ба фарқ,  
Таҳарруқ ани қилди андоқки барқ.

Гахи бўлди даврон била тундхўй,  
Гахи чархи гардонға деди: «Туфу!»

Ошиб дам-бадам изтироби анинг,  
Еру кўкка таъну итоби анинг.

Бу ошуб дардиға бўлмай даво,  
Черик жамъиға бўлди фармонраво.

Киши чопти оғоқ аро бедаранг,  
Бажуз Рум ила Зангбору Фаранг1.

Сипаҳ баҳриға тушти ул навъ жўш  
Ки, ўтти фалак лужжасидин хуруш.

Ҳам Эрону Турон2, ҳам ақсойи Чин,  
Анга тегруким, ҳадди Машриқ замин.

Чиқиб ул сифатким, киши қолмайин,  
Демай қолмайинким, қола олмайин.

Анга тегруким, ҳадди ақсойи ғарб,  
Бутуб борчанинг жисмидин сози ҳарб.

Яна ҳам диёри Жанубу Шимол,  
Киши қолмоғи топмайин эҳтимол.

Башар жинси хайлиң жаҳондин йиғиб,  
Жаҳон аҳлини тўрт ёндин йиғиб.

Сипаҳ жўш уруб тоғу ҳомун аро,  
Ғалат айладим, рубъи маскун аро.

Сураб элни зобит сипаҳдорлар,  
Сиёsat тариқида ғаддорлар.

Бу янглиғ черик яхшироқ фол ила,  
Ики йилда жамъ ўлди тунқол ила.

Сипоҳийки ер сатҳиға сиғмайин,  
Черик ҳаргиз андоқ киши йиғмайин.

Не учу қироқ эрди пайдо анга,  
Не ҳадду не ғоят хувайдо анга.

Ададда фалак анжумидин фузун,  
Не анжум, биёбон қумидин фузун.

Чу мавъидға жамъ ўлди мундоқ сипоҳ,  
Билиб ул сипаҳ сори азм этти шоҳ.

Назар солди чун ул черик сори тез,  
Адоват ўтин айлади шуълахез.

Димоғига йўл топти навъи ғурур

Ки, гардун қочар қилсам ул ён убур.

Етиб ҳар тарафдин улус шаҳлари  
Ўкуш тортиғу тухфа ҳамраҳлари.

Ақолим волийлари жавқ-жавқ,  
Итоат солиб борча бўйниға тавқ3.

Чу Доро тушуб боргоҳи аро,  
Тушуб жўш хайлу сипоҳи аро.

Қўюб боргоҳ ичра тахти баланд,  
Чиқиб тахт уза хусрави аржуманд.

Тузуб маснадеким, сипехри барин,  
Яна кўрмайин, ўйла маснаднишин.

Қилиб ҳукмким: «Мулк султонлари,  
Қамуқ хайлу кишвар нигаҳбонлари,

Келиб борча ер ўптиқ айлаб салом,  
Мунунг бирла касб айладик эҳтиром».

Салотинға чунким, бу навъ ўлди бор,  
Топиб ишлари сиккаи эътибор.

Йироқтин келиб, борча бош индуруб,  
Тикиб ерга кўз, ўқ учидин туруб.

Чу ҳар бирни кўрмакка шоҳ истабон,  
Бориб ҳожиби боргоҳ истабон.

Келиб ул бисоти қироғин ўпуб,  
Қўюб оллида бош, аёғин ўпуб.

Ёниб, чун бўлуб ўрниға раҳхиром,  
Яна бир бўлуб хоки даргаҳхиром.

Бу янглиғ ярим кунгача эрди маҳл  
Ки, топти шараф улки бор эрди аҳл.

Хито мулкидин Мангу-қоон киби,  
Яна Ҳинд элидин Қарохон киби.

Ҳамул Мисрдин Варқау Бошдек,  
Доғи Даشت элидин Темуртошдек.

Фарангисдек Ховарон мулкидин,  
Даволи киби Ширвон мулкидин.

Шаҳу шоҳзода ададдин фузун,  
Сипаҳдору сархайл ҳаддин фузун4.

Ки, побўсидин бўлдилар сарбаланд,  
Яна илтифоти била аржуманд.

Бўлуб кўрмагидин чу олий асос,  
Яна пешкашлар чекиб бекиёс

Ки, юз минг муҳосибқа юз йил шитоб,  
Етишса қила олмағайлар ҳисоб.

Бу ашғолни айлабон бартараф,  
Халойиқни тарқаттилар ҳар тараф.

Не сархайлким бор эди ҳар сари,  
Тилатти иноят қилиб ичкари.

Қилиб тожварларға хукми жулус,  
Бори ўлтуурурға бўлуб хокбўс.

Чу атрофида шоҳлар ўлтуруб,  
Сипаҳдорлар хизматида туруб.

Улуғлар чу алтофидин топти баҳр,  
Равон бошлади нукта Доройи даҳр

Ки: «Боис чекарга бу янглиғ сипоҳ,  
Халойиқ фароғин қилурға табоҳ

Бу эрдики, чун Румдин Файлақус,  
Жаҳон риҳлати азмиға урди кўс,

Қолибдур анга зодае мажнунваше,  
Судек кажраве, ўт киби саркаше.

Йибормай хазойинға уч йил хирож,  
Бошиға сарафрозлиқ солди тож.

Чу борди киши билғали шарҳи ҳол  
Ки, ўз хизматин невчун этмиш ўсол?

Анинг бирла бу можаро сургали,  
Бақоёни девонға келтургали.

Паришон такаллум қилиб беадад  
Ки, йўқтур анга, ўйла сўз дерга ҳад.

Яна қилдим ирсол қўп навъ панд,  
Анга ҳеч панд ўлмади судманд.

Жавобида қўп қилди тарки адаб,  
Мени доғи ошуфта қилди ғазаб.

Ешигтгач қулайсиз мақолин анинг,  
Зарурат кўруб гўшмолин анинг.

Бўлуб боис ул гўлу нодон иши,  
Черик жамъиға чопти ҳар ён киши».

Дедилар қўпуб, ер ўпуб шоҳлар,  
Сипаҳбадлиғ амридин огоҳлар

Ки: «Қилмоққа ҳолини онинг табоҳ,  
Не ҳожат эди айламак азм шоҳ.

Бу янглиғ черик ҳожат эрмас эди,  
Анинг дафъиға бир қуле бас эди.

Қаю бирга бу иш иноят бўлур,  
Ҳамоноки бу иш кифоят бўлур».

Деди шоҳким: «Чун йиғилмиш сипоҳ,  
Керак Румни қилсақ оромгоҳ.

Чу кирмиш анга Зангбору Фаранг,  
Алар фикрига ҳам керактур даранг.

Неча кун бу ерлар тавофи қилиб,  
Адудин мамоликни софий қилиб,

Агар қайтсақ ҳам эмастур йироқ,  
Ҳар андешадин бу эрур яхшироқ».

Чу шоҳ оғзиға солди бу сўз қазо,  
Қазо амриға чора йўқ жуз ризо.

Неким шаҳ деди, иттифоқ эттилар,  
Бори Рум азмин яроқ эттилар.

Манозил битиб, бўлдилар жазми қўч,  
Қўпуб ҳар тараф қилдилар азми қўч.

Буларға бўлуб кўч-баркўч азм,  
Скандарга доғи хабар етти жазм,

Ки, Доро йигиб ер юзидин сипоҳ,  
Буён айламиш азм беиштибоҳ.

Худ эрмас эди ғофил ул ҳолдин,  
Ишида йироқ эрди эҳмолдин.

Узотиб дамо-дам адуға киши,  
Паёпай хабар топмоқ эрди иши.

Қаю ишгаким фаҳм этиб эҳтиёж,

Фароғат била айлар эрди илож.

Сипоҳини ул шоҳи навхоста,  
Анингдек қилиб эрди ороста,

Ки, оллиға чекса сипаҳ оламе,  
Ки бўлса алар ҳар бири Рустаме,

Нечукким ел оллиға бўлғай самон,  
Етишмак ҳамону – совурмоқ ҳамон.

Ва лекин шиори мадоро бўлуб,  
Таҳаттук йўқ андоқки Доро бўлуб5.

Чу Доро ҳадиси анга бўлди туз  
Ки, олам сипоҳин йигиб қўйди юз.

Бу янглиғ черикким баён айладим,  
Рақам бирла васфин аён айладим.

Тузуб ул хирадманди ҳикматмаоб,  
Адув рўбарўйига қилди шитоб.

Нечукким тенгиз сори ғурранда абр  
Ва ё гўр хайлиға ғуррон ҳизабр.

Чу фаҳм этти ул ишни Доро доғи,  
Ки борди ародин мадоро доғи.

Анинг чиқмоғи бўйла беваҳму пос,  
Адув хайлиға солди беҳад ҳарос.

Чу ўн манзил ўлди аро ерда жазм,  
Ики ёндин ўлди тааннию ҳазм.

Юруш расмида бўлмас эрди ўсол,  
Кўчарда, тушарда бор эрди ясол.

Тушулгач, черик даврини шақ қилиб,  
Сипаҳ ҳифзи айларга ҳандақ қилиб.

Қуёш чун ботиб кўкка соя чиқиб,  
Ҳамул ики ёндин талоя чиқиб.

Язак аҳлиға, ўйла бедорлик,  
Талоя аро, ўйла хушёрлиқб.

Ки, гар мўр тебранса қилмай даранг,  
Тикарлар эди кўзин отиб хаданг.

Бу янглиғ сипаҳ бошлабон икки шоҳ  
Ки, бир кунчилик қолди йўл размгоҳ.

Аро ерда тоғе эди бас рафөй,  
Ики ёнида ики дашти вәсөө.

Ики дашт аро ики хүсрав эли  
Ки, йўл топмай ул эл аро тонг ели.

Скандар сипаҳ теграсига етиб.  
Нечаким керак забтида жаҳд этиб,

Ясад хандақу ҳисн Хайбар киби,  
Не Хайбарки, Садди Скандар киби7.

Чу кўнгли бўлуб тинч юз тиғзан,  
Бори лашкарою лашкаршикан.

Ойириб ўзи бирла бўлди равон,  
Зихи, ҳам сипаҳдору ҳам паҳлавон.

Ҳамул тоғ уза чиқти ул хайл ила,  
Адувнинг сипоҳин тамошо қила.

Не кўрдики, тутмиш сипаҳ ер юзин,  
Қаро айлабон дахр тоғу тузин.

Таҳаррук топиб халқдин дашту тоғ,  
Таҳаррукка ҳам кимса топмай фароғ.

Фалакни анингдек тутуб дуду гард  
Ки, пинҳон бўлуб гунбади ложувард.

Топиб гард ила дуд чун имтизож,  
Бериб ўту туфроққа бир мизож.

Қаёнким Скандарга тушти назар,  
Топа олмади халқ ичидин гузар.

Қила олмайин эл қиёсини ҳеч,  
Таҳайюр анинг мағзини қилди геч.

Хаёлида бу сўзким: «Ики черик  
Қачон сунсалар кин ишига илик,

Бири ёна бирча эса ики-уч,  
Ерур ҳарб ойини озроққа куч.

Агар бўлса бир сори ёлғуз киши,  
Ғаним ўлса ўтрусида юз киши.

Агар истаса ҳарбу парҳошини,  
Илик бирла кесмактур ўз бошини.

Манга мунча ҳикмат тариқида лоф,  
Ажаб ерда ёйдим бисоти масоф.

Бу ердин ёнарнинг худ имкони йўқ,  
Набард айласам ғайри нуқсони йўқ!»<sup>8</sup>

Бу фикр ичра ройи хирадпарвари  
Ки, бир тош уза ики кабки дарий

Кўрундики, бир-бирга айлаб ситез,  
Урушурлар эрди басе тунду тез.

Бири жусса ичра забардастроқ,  
Яна бир ҳақир эрдию пастрок.

Анга неча қувват, мунга онча заъф,  
Де олғонча қувват, де олғонча заъф.

Скандар чу ул заъфу қувват кўруб,  
Ўзи бирла Дороға нисбат кўруб,

Алар сори боқти тааммул била,  
Ўзию адувға тафаъул била.

Ўзи жонибидин ҳақири тутуб,  
Адув ўрниға ёна бири тутуб.

Қилур эрди ул ҳарб наззораси,  
Тараддуд аро жони бечораси.

Ки, ногоҳ ҳаводин уқобе иниб,  
Қилиб сайд олурға шитобе иниб,

Улуғроғни сайд этти ул навъ чуст  
Ки, гўёким ул худ йўқ эрди нухуст.

Уқоб илгига бўлғоч ул бир табоҳ,  
Яна бирга бўлди ери жилвагоҳ.

Скандар бўлуб хушдил ул ҳолдин,  
Тануманд ўлуб кўнгли бу фолдин.

Билибким, анга хасм ўлур зердаст,  
Ва лекин топар ўзга ердин шикаст.

Бу ишдин ўзига шугун англабон,  
Ёниб хасм қадрин нигун англабон.

Сипоҳиға кирди топиб бу футух,  
Анингдекки, жонсиз бадан ичра рух.

Чу ул тоғдин инди топиб наво,

Күёш чекти тоғ кейин сори ливо.

Фалак машъали кўқтин ўлғоч нигун,  
Замона бўлуб дудидин қиргун.

Ўзин айлабон маҳкам ики сипоҳ  
Сипоҳ интизорин чекиб размгоҳ.

Язак айлабон, ўйла огоҳлиқ  
Ки, қилмай анга соя ҳамроҳлиқ.

Талоя бўлуб ҳар тарафтин мудир,  
Тун ўғрисин этмак тилаб дастгир<sup>9</sup>.

Язакдин сипаҳ даврида, ўйла бим  
Ки, тебранмак имкони топмай насим.

Улус, ўйла мазбут ўлуб ҳар сори  
Ки, ун ҳам чиқа олмайин ташқори.

Ики шоҳ ҳар сори иш фикрида,  
Ясол зикри бирла тикиш фикрида.

Нари юзда Доройи анжумсипоҳ,  
Боши узра гардун киби боргоҳ.

Қилиб таҳт уза иш яроғини гуфт,  
Бори навъидин ошкору нуҳуфт.

Ўзи жониби фатҳ лозим кўруб,  
Ливосиға нусрат мулоғим кўруб.

Кўзига Скандарни ҳеч илмайин,  
Қазодин не ҳол ўлмоғин билмайин.

Сипаҳбадлари худ ғулу айлабон,  
Скандар сўзин гуфтугў айлабон

Ки: «Гар шоҳ ҳукм этса беваҳму бийм,  
Ерурбиз анга ҳар биримиз ғаним».

Бири дебки: «Кўргач қаро қочқуси»,  
Бири дебки: «Узр эшигин очқуси».

Ва лекин Скандар сори барча жазм  
Ки, қилмоқ керак тонгла ўлгунча разм.

Қавий хасмға мумкин эрмас шикаст,  
Магар улки кўргузгабиз зарби даст.

Кўзидин бориб уйқу осойиши,  
Иши разм ахлининг оройиши.

Елига карамдин етурмак навид,  
Қочар элга бим, иш қилурға умид.

Ели ҳеч тинмай ясаб созу барг,  
Мұхайё қилиб жавшану худу тарг.

Күрунуб узун кина аҳлиға тун,  
Вале кун хаёлоти тундин узун.

Бу янглиғ әди ики ёндин хаёл  
Ки, бўлди аён субхи фаррухжамол.

Саҳар ошкор этти заррин ливо  
Ки, бўлди ёруғ маҳласидин ҳаво.

Қазо солди ул ики дарёға жўш  
Ки, Баҳром самъига етти хурӯш.

Чекиб гурдлар наъраи ҳоила  
Ки, солиб ер ажзосига зилзила.

Зухур айлабон «арзу зилзолаҳо  
Ва ахражатил-арзу асколаҳо»<sup>10</sup>.

Бўлуб тиғзанлар қадам то ба фарқ,  
Фалак туркидек кўқ темур ичра ғарқ<sup>11</sup>.

Ясаб ҳарб учун ўзни маркаб уза,  
Таковар суруб, ўз ясолин туза.

Чу отланди Доройи давлатпаноҳ,  
Скандарға ўтру тузатти сипоҳ.

Сипаҳ дема, дарёйи хунхор, де,  
Фалак баҳри андин намудор, де.

Сафе тузди тузмакка ойини ҳарб  
Ки, бир қамбали-шарқ әди, бири-ғарб.

Ясолеки бу тул ила қўргузуб,  
Будур турфаким, ети дабқур тузуб.

Боронғор<sup>12</sup> анга хайли Машриқ замин,  
Самарқанддин токи сарҳадди Чин.

Яна юз минг ўзбак мўғул бирла зам,  
Юз эллик минг ул сори қалмоқ ҳам.

Бўлуб борчаси олти юз минг киши,  
Борига хунар кин ила разм иши.

Ясаб Чин элин турки чинийсиришт,  
Тароватда андоқки боғи биҳишт.

Ети ранг зарбафт ҳар паҳлавон,  
Солиб бодпойига баргуствон.

Довулғода чиний ялов дилпазир,  
Яна жавшан устига чиний ҳарир.

Ясолеки қалмоқ хони ясаб,  
Ажал дўзахидин нишоне ясаб.

Томуғ шуъласи барча рангин ялов,  
Билиниб ялов жилвасидин қалов.

Ҳар ўпчинлук онча қилиб карру фар  
Ки, андин тушуб дахр аро шўру шар.

Алар хайлиниңг хони Тўқвоб ўлуб,  
Уруш вақти озармдин тоб ўлуб.

Мўғул шерпайкарлари ўту ёлин,  
Тааддуд аро ит тукидин қолин.

Булар хони Мангу келиб разм аро  
Ки, ошуби оламни айлаб қаро.

Яна манғит ўзбак била ёндашиб,  
Ики зулфдек тузлари чирмashiб.

Кумушдек ёруғ барчаниңг кўҳаси,  
Боз узра довулғалар чаркасий.

Алар ёнида Мовараннаҳр эли,  
Ики руд аросида ўн шаҳр эли.

Бори шергиру бори пилзўр,  
Тикиб ўқ била кўзларин бўлса мўр.

Жинонваш Самарқанд мавжуд йўқ  
Ки, қилмиш бино они Искандар-ўқ<sup>13</sup>.

Жувонфорда Мағриб эли бир сари,  
Яна сори Бартосиу Барбари.

Синонлар сариф ранг, қалқон доғи,  
Кежимлар сариф жинс, хафтон доғи,

Араб барридин найзавар кирқ минг  
Ки, якрони този келиб борчаниңг.

Аламлар қароу синонлар каро,

Бедов узра баргуствонлар қаро.

Ҳамул мағриб аҳлини бошлаб Талиъ,  
Араб хайлиниң пешвоси Вакиъ.

Мадойин навоҳисидин Ардашер,  
Чекиб тиф, хайлида юз минг далер.

Бинафш айлабон шадда бирла дирафш,  
Саманд узра баргуствон ҳам бинафш.

Қутайф аҳли, Баҳрайну Бағдод ҳам,  
Сипаҳбад аларға келиб Густаҳам.

Бўлуб сарбасар кўк темур ичра ғарқ,  
Кўк атласда пинҳон қадам то бафарқ.

Жувонғор ҳам олти юз минг адад,  
Булар бошқа андинки бўлғай мадад.

Ҳировул ясаб ети юз минг киши  
Ки, ҳайрон қолиб ети қўк гардиши.

Борининг келиб худу хафтони оқ,  
Неким кийгулуктур ясаб они оқ.

Бу кофургун саф аро разм эли,  
Келиб Даشتி Қифчоқу Хоразм эли.

Ўзидин топиб ғул фаррӯ шукух,  
Сипаҳ саф тузуб даврида кўҳ-кўҳ.

Килиб андоқ ороста етти ғул  
Ки, ел хайли топмай аро ерда йўл.

Бўлуб ҳар саф ул элга юз минг нафар,  
Шаҳ ойинидин барчага зебу фар.

Булар киймаги барча ахзар бўлуб,  
Аламға яшил шуққа зевар бўлуб.

Бўлуб олам ул сабзадин марғзор,  
Яшил хат бўлуб ер юзига узор.

Ҳамул қалбоҳ ичра Доройи даҳр,  
Хилоғиға йўқ ҳадду ёройи даҳр.

Бу янглиғ ясаб созу ойини разм,  
Адув сори таскин била қилди азм.

Нари юзда Искандари шердил,  
Қилиб хайли оройиши муттасил.

Боронгорин айлаб сипоҳи фаранг,  
Бори қон тўкарга бўлуб бедаранг.

Адувнинг қалин эрконин билмайин,  
Агар билса ҳам кўзга ҳеч илмайин.

Сипаҳдор алар ичра Шайпол14 ўлуб,  
Таҳаввурда чун Рустами Зол ўлуб.

Кийимлар гуҳардин мукаллал бори,  
Фарангий ети ранг маҳмал бори.

Аlam шуққаси доғи жинси фаранг,  
Ҳам ул борча зарбафту ҳам ети ранг.

Адув ичра юз минг бори тезу тунд  
Ки, ҳайбатларидин қуёш тифи кунд.

Жувонғорида эрди Бартосу Рус,  
Фалак хингидек барча тунду шамус.

Алар жавшани борча қолқондуруқ,  
Синон қўлларида нечукким сўруқ.

Вале бодполарға солғон кежим,  
Сақарлоту борча ёвурқон кежим.

Довулға бўлуб тўппи янглиғ бари,  
Ўтоға бош узра сарик қуш пари.

Келиб ҳар бири кеча андоқки бүм,  
Мувофиққа маймун, мухолифқа шум.

Булар доғи юз минг келиб сон аро,  
Чекиб саф жувонгорда майдон аро.

Ҳировулда занг аҳли таъйин бўлуб,  
Аларға яна ўзга ойин бўлуб.

Кийиб барчаси жавшани зангсоз,  
Ёруқ кўзгудек зангдин бениёз.

Яна худлар мисли жавшан келиб,  
Қаро тунда хуршиди равшан келиб.

Ўтоға темур бирла шаҳпар мисол,  
Қуёш узра сончиб нечукким хилол.

Кежимлар доғи барча пўлоддин.  
Топиб ламъа сухони бедоддин.

Ёрга оҳа юз минг адув ўтруси,  
Саросар ажал шахсининг кўзгуси.

Қилиб ғулини борча Румий сипох,  
Топиб зийнат ул ғул ила размгоҳ.

Қизил юз била борча андоқки шер,  
Адув қасдига шер янглиғ далер.

Кежим борчага шеру бабру паланг,  
Жиба узра хафтон доғи ушбу ранг.

Бўлуб ҳар бир, андоқки, ғурранда абр,  
Дегил тутти олам юзин шеру бабр.

Туруб қалб аро шоҳи фарруҳсарир,  
Нечукким ҳизабре, vale шергир.

Боши устида шерпайкар алам,  
Есиб анга нусрат ели дам-бадам.

Бу янглиғ сипаҳ бирла дорои Рум,  
Сипоҳин ясаб, ўйлаким нахли мум.

Юруб хасм хайлиниңг ўтрусиға,  
Мунунг ул ҳам андоқки қаршусиға.

Чекиб кўс уни ики ёндин ғирев,  
Анингдекки, маст ўлса юз нарра дев.

Фалак турки гардунни ики чопиб,  
Анинг ҳар бирисига бир юз ёпиб.

Адув шайнини кимса қилмай қиёс  
Ки, нокор ўлуб ғулғулидин ҳавос.

Нафир, ўйлаким аждари тездам,  
Тахаррук солиб бўйниға ики хам.

Оғиз очмоғи элни тутмоқ учун,  
Ва ё хасм хайлини ютмоқ учун.

Яна карраною ковурго уни,  
Қилиб ошкоро қиёмат куни.

Аламларки елдин бўлуб жилвагар,  
Фулклар набардидин айтиб хабар.

Ҳавони анингдек тутуб тийра гард  
Ки, бўлмай аён кўзга дашти набард.

Кўп элким қилиб гирд қилмоғин вирд,

Курра шакли ернинг бўлуб нимгирд.

Сипаҳ наълидин ёнчилиб ёрими,  
Бўлуб гард янглиғ фалак озими.

Бу дарёйи гард ичра тушган киши,  
Нафас қайтарурдин су ютмоқ иши.

Қолин тиф ул гарди ҳайжо аро,  
Ўкуш мўр оқиб лойи дарё аро.

Дема гардким, эрди мушкин саҳоб,  
Еру кўқ аросиға тортиб никоб.

Чоқиб барқ ўти оҳалар ишнари,  
Чекиб раъд уни боралар кишнари<sup>15</sup>.

Тутуб қўлга жабборлар тифи тез,  
Фалак тортқондек синони ситеz.

Бу янглиғ ики олами қатлу кин  
Ки, титраб алардин замону замин.

Юруб бир-бирига яқин еттилар,  
Аёғ тоғдек ерга беркиттилар.

Сурон солдилар аввал ул навъ тез  
Ки, оламға тушти ажаб рустахез.

Демасменки, қўзғолди олам эли  
Ки, булғашти бу сабз торам эли.

Кўяр эрди ҳамлин фалак беваси,  
Сатарванлиғ ар бўлмаса шеваси<sup>16</sup>.

Чу бир лаҳза топти суқун ул хурӯш,  
Улус оғзи ғавғодин ўлди ҳамӯш.

Насими ваго бир сори сурди гард,  
Кўрунди халойикқа дашти набард.

Ҳамул ҳар тарафдин бир анбуҳ саф,  
Не анбуҳким, кўҳ то кўҳ саф.

Қилилғон киби лавн-лавнин баён,  
Тамошо қилур элга бўлди аён.

Анингдекки тушгай чоқиндин дурахш,  
Скандар сафидин бирор сурди рахш.

Тарид айлаю кирди майдон аро.  
Хунарлар аён қилди жавлон аро.

Солиб бодпойиға баргуствон,  
Намудор аро, ўйлаким арғувон.

Кийиб жавшан устига чиний ҳарир,  
Келиб сув уза сабзадек дилпазир.

Синон ўнг қўлинда нечукким сутун,  
Сўл эгнида қалқон келиб лаългун.

Ўтоға тикиб худида савсани,  
Бўлуб ғунчадин савсан очмоқ фани.

Бу ҳайъат била чобуки жангжўй,  
Туруб ўртада бошлади гуфтугўй.

Скандар дуосин бурун қилди ёд  
Ки: «Топсун адусиға кому мурод!»

Яна деди юз келтуруб ҳар сари  
Ки: «Дерлар мени Бориқи Барбариј17.

Бурун бор эдим шоҳ Дороға қул,  
Вале топмадим қуллуғи ичра йўл.

Мени, ўйлаким бор эдим билмади,  
Риоят, нечукким керак, қилмади.

Топиб мендин ўқсуклар андин наво,  
Манга кўрди кўп бенаволиграво.

Чу ҳолим дедим, шоҳи олийсифот,  
Жавобимға ҳам қилмади илтифот.

Ижозат сўзин арз қилғоч туруб,  
Таёғлатти қаҳр айлабон бостуруб.

Чу Доро қилиб мунча зулму шикаст,  
Мени қилди баҳтим Скандарпарааст.

Чу даргоҳиға еттим истаб паноҳ,  
Манга онча лутфу карам қилди шоҳ.

Ким ул тарбиятдин сарафкандамен,  
Иш этмай олиб музд, шармандамен.

Буқунким, қилибмен бу майдонға азм,  
Ики иш учун айлагум кину разм:

Бир улки: шаҳимға қилиб бандалиқ,  
Ўзумдин қилай рафъи шармандалиқ.

Яна улки: чун қатл расмин тузай,  
Ишим шоҳ Дороға ҳам кўргузай.

Ўзин улки ҳарбимға мойил қилур,  
Манга ики мақсуд ҳосил қилур:

Аларғаки шоҳи хирад раҳнамун,  
Иноят қилиб эрди мендин фузун.

Бўлурким паёпай равон айлагай,  
Яко-як борин имтиҳон айлагай».

Чу Бориқ тугатти каломин тамом,  
Алардинким ул айламиш эрди ком.

Равон бўлди майдонға қотилваше,  
Тутундек ғализ, ўт киби саркаше.

Оти наълидин токи худида мил,  
Кириб кўк темур ичра андоқки нил.

Оти наълидинким шарап айрилиб,  
Бало абридин марг ўти чоқилиб.

Фалаксайри ошуби пайваст ила,  
Солиб ел димогиға фарраст ила.

Ҳамойилдағи тифи бежодадек,  
Кўл ичра синони келиб ходадек.

Ани разм эли шери даррон, дебон,  
Отин анжуман аҳли Ҳаррон18 дебон.

Чу майдон тариқин адo айлади,  
Туруб хусравиға дуо айлади.

Тугатгач дуо, чопти Бориққа тез,  
Анга доғи Бориқ бўлуб барқхез.

Бири-бирга майдонда чирмошилар,  
Басе бир-бираидин қолиб, оштилар.

Уч уз олтмиш олти лаъбу гирих,  
Ўтубким синон учи кўрмай зирих.

Ҳам охир чу Бориқ эди ишта чуст,  
Синон бирла маркабдин они дуруст

Йироқ солди андоқки, чархи барин,  
Синону қўлиға деди: «Офарин!»

Тушуб, бўйниға боғлабон полаҳанг,

Шаҳ оллиға еткурди қилмай даранг.

Скандарга фархунда бўлди бу фол  
Ки, нусрат анга аввал очти жамол.

Яна шерпайкар яли хасмбанд,  
Ер ўптию майдонга сурди саманд.

Тилар эрди ҳайжо қилурға тане  
Ки, размиға от сурди пилафкане.

Далереки то разм варзиш қилиб,  
Адувсиға юз маърака иш қилиб.

Темур ичра боштин-аёғи ниҳон,  
Нечукким ўзи, оти доғи ниҳон.

Лақаб Шайда 19 бирла анга фош ўлуб,  
Насаб бирла Ҳарронға қардош ўлуб.

Йўлин тўсти Бориқнинг ошуфтаваш,  
Анга сурди Бориқ доғи кинакаш.

Яна қўйдилар саъю қўшишга юз,  
Синонларни айлаб бири-бирга туз.

Чу ёр ўлди иқболи Искандарий,  
Яна топти фурсат яли Барбарий.

Ани ҳам қилиб найза бирла нигун,  
Чекиб шоҳи оллиға хору забун.

Скандар фалақдин топиб кому баҳр,  
Фалакка қилиб таън Доройи даҳр.

Чопиб Барбарий бўлди майдоннавард,  
Мубориз тилар эрди истаб набард.

Яна гармкине солиб юзга чин,  
Чопиб Барбарий қасдига гармкин.

Етишмак ҳамону етишган замон,  
Диловар қўлидин йиқилмоқ ҳамон.

Бу янглиғ тўқуз паҳлавони далер  
Ки, ҳар бир эди иш чоғи нарра шер,

Бори Барбарийға асир ўлдилар,  
Синон заҳмидин дастгир ўлдилар.

Яна ҳарбиға кимса майл этмади,  
Вале Бориқ ўз ўрнидин кетмади.

Мубориз тилаб бор эди наъразан,  
Замириға аъдонинг оташфикан.

Ғазаб солди Дороға кўп изтироб:  
«Анга кимса чиқсун!» деб этти шитоб.

Ҳам охир бирор сурди майдонға от,  
Адувға суруб солди жавлонға от.

Ҳам ул пилзўр эрди, ҳам пилтан,  
Таковар анга, ўйлаким каркадан.

Палангина баргуствон отиға,  
Кийиб бабр тўн халқ оғотиға.

Қизил хўддин бошида нимтарг  
Ки, ваҳмидин ўлуб ўлум ҳоли марг.

Ҳамул хўд давриға чирмаб қаро,  
Киши қўрмамиш лолани доғ аро.

Юзи улча мумкиндур аҳмар аниңг,  
Маҳосин юзи узра асфар аниңг.

Юзи ранги хурмо масаллик касиф,  
Маҳосин намудори хурмоға лиф.

Ики кўз анга икки олмосдек,  
Вале давраси қон тўла тосдек.

Ватангоҳи ақсойи Мағриб замин,  
Ели эрмиш ул ерда водийнишин

Ки, бу янглиғ эрмиш алар ҳайъати,  
Қўшун элча ҳар қайсининг шавкати.

Не хусравки, ул бўлса оламга шоҳ,  
Чекар бўлса бир хасми сори сипоҳ.

Келур эрмиш ул қавмдин бир киши,  
Ки саъб ўлса аъдодин ул шоҳ иши.

Қилур эрмиш ул шахс майдонға азм,  
Намудор этар эрмиш ойини разм.

Чу бўлди адуси гирифттор анга,  
Бўлур эрмиш уй сори рафттор анга.

Киши турғуза олмас эрмиш ани,  
Анга тегруким манзилу маскани.

Гирифторини дөғи элтур эмиш,  
Буюрур эмиш ҳар нечук топса иш.

Чу Бориқдин эл эрди ҳайратқа гарк,  
Ул оханги кин этти андоқки барк.

Иков бўлди майдонда пархошжўй,  
Чопарлар эди чирманиб сў-басўй.

Гаҳи бу қочиб, ул кейиндин суруб,  
Ки, майдон бошиға дегин еткуруб.

Бу қайтиб анинг гоҳ подошиға,  
Қовуб токи майдоннинг ул бошиға.

Гаҳи совуруб гард, этиб тобу печ  
Ки, қилмай қуюндин киши фарқ ҳеч.

Чу асраб ўзин Бориқи кинпараст,  
Анга Мағрибий топмайнин ҳеч даст.

Вале бўлди Бориқ иши нурсиз  
Ки, қўшиш қилиб эрди мақдурсиз.

Ўзидек тўқуз кимса олмиш эди,  
Бу кирган замон илги толмиш эди.

Чу ахволида бўлди заъф ошкор  
Белидин тутуб гурди мардумшикор.

Қўнқордию ўнг илгига қилди руст,  
Сўл илги била маркабин тутти чуст.

Чу топиб маҳал, сайдини сирмади,  
Ёниб ўз сипоҳига ҳам кирмади.

Равон бўлди Мағриб сори азм этиб,  
Ғанимни олиб, раҳнавардин йитиб.

Анга айланон ҳайрат аҳли жаҳон,  
Анга тегруким, бўлди кўздин ниҳон.

Кўруб Мағрибийдин бу бебоклик,  
Скандарга юзланди ғамноклик.

Яна Барбарий ҳолига ғам ебон,  
«Анинг ҳоли не бўлди эркинг» – дебон.

Бўлуб шодким, борди сахро сари,  
Ёниб қилмади азм Доро сари.

Вале шоҳ Доро, басе шод ўлуб,

Бузуғ күнгли ул ишдин обод ўлуб.

Буким Барбариининг бўлуб ғолиби,  
Анинг сори келтурмади Мағрибий.

Неча шодмонлиққа монеъ эди,  
Вале хасм дафъига қонеъ эди.

Чу хуршид дороси этти камин,  
Камингоҳ анга бўлди Мағриб замин.

Қилиб жилва ой меҳри ховар киби,  
Улусни ёрутти Скандар киби.

Ёниб размгаҳдин ул ики сипоҳ,  
Тушуб берк туттилар оромгоҳ.

Тутуб хандақ ики сипаҳ даврини,  
Қанот, ўйлаким боргаҳ даврини.

Талоя яна чиқти ҳар соридин,  
Язак тинмади ҳифз изҳоридин.

Қилиб боргоҳ ичра Доро мақом,  
Зарурат юзидин тилаб руду жом.

Вале қон ютуб шиша янглиғ ниҳон  
Ки, тонгла не иш зохир этгай жаҳон?

Скандар доғи ўзга ойин топиб,  
Бир Искандар онида таскин топиб.

Топиб ўнг ёнида камол аҳли ер,  
Тутуб сўл қўлида қитол аҳли ер.

Тааммул била ҳар хирадпешае,  
Қилиб фатҳ бобида андешае.

Таҳаввур била ҳар жаҳонпаҳлавон,  
Тилаб нусрат ончаки тобу тавон.

Чу ўтти кеча хайлидин ики пос,  
Бирор элда журъат, бирорда ҳарос.

Тилаб хилвате шоҳи яздонпараст,  
Тазарруъ қила бўлди туфроққа паст.

Зафар истамакдин чу топти фароғ,  
Саҳар нажми ёрутмиш эрди чароғ.

Яна тушти ошуబ ики тараф,  
Ики хайл ҳар ён тузатмакка саф.

Яна күсзан тушти жунбуш аро,  
Яна күс тушти ғурунбуш аро.

Хамул найзavarларға тушти шитоб,  
Хамул найзалар жисмиға печу тоб.

Хамул тиғзанларға бўлди масоф,  
Хамул тиғлар бўлди паҳлушикоф.

Хамул бўлди кин бенадомат яна,  
Хамул қойим ўлди қиёмат яна.

Скандар қилиб хилват ичра ниёз  
Ки, қилғай анинг чорасин чорасоз.

Чиқар вақтида қосиде етти чуст,  
Ниҳони тутуб номае оғзи руст.

Анга еткуруб нома хилват аро,  
Дедиким: «Ўқуб англағил можаро».

Скандар очиб, қилди наззораси,  
Ҳақ айлаб эди дардининг чораси.

Ҳамоноки Дорога ики киши,  
Бор эрмиш наёбат аларнинг иши.

Вале зулмидин жонларидин тўюб,  
Икиси кўнгул ўлмакига қўюб.

Бериб бийм Дороки топқач зафар,  
Ул икига гўр оғzin этгай мақар.

Ул ики киши ҳам яроқ айлабон,  
Анинг қатлиға иттифоқ айлабон

Ки: «Чун бизга ул қилғуси биғи қатл,  
Анга биз бурунроқ чекиб тифи қатл,

Йиқоли дараҳтини бунёдидин,  
Қутулсун улус зулму бедодидин.

Неча зулмидин жонимиз қолмағай,  
Бу навъ ўлсак армонимиз қолмағай».

Скандарга ёзғон эмишлар битик,  
Бирорни юборган эмишлар итик.

Қилиб номада сабт бу сўзларин,  
Анга боғлағонлар эмиш ўзларин.

Үкуди Скандар чу ул номани,  
Не навъ эрканин билди ҳангомани.

Ва лекин гумон қилди макру фириб,  
Дам урмай ўз-ўзига берди шикиб.

Дедиким: «Мунга ҳеч янглиғ жавоб,  
Демакда эмас эрди ройи савоб

Ки, ёлғон эса демаган яхшироқ,  
Чин эрса бу бор анда етмак йироқ».

Таваккал қилиб рокиб ўлди равон,  
Адув кинига роғиб ўлди равон.

Тузалди яна ики ёндин ясол,  
Яна ошкор ўлди расми жидол.

Бурунроқки майдонға киргай биров,  
Ики қотил этган киби сўз гаров,

Етиб шоҳ Доро ики ёнидин,  
Қилич лаългун қилдилар қонидин.

Бири суғлубон гурдагохиға тиғ,  
Тўкуб ерга қонин анинг бедариг.

Яна бир доғи тиғ уруб бошиға,  
Қилиб зулм анинг зулми подошиға.

Ебон захм ул навъ дорои тахт,  
Йиқилди анингдекки олий дараҳт.

Тушуб ер уза шоҳи Баҳманнажод,  
Ўчуб машъали дудай Кайқубод.

Қазодин бу навъ иш чу пайдо бўлуб,  
Боши узра элдин алоло бўлуб.

Сипоҳида пайдо бўлуб қўзғалиш,  
Сипаҳ қўзғалур, шаҳға чун тушти иш.

Скандар тариқи киёсат била,  
Қилиб фаҳм ул ишни фаросат била.

Таанни била азм этиб ул тараф  
Ки, бўлмай паришон сипоҳига саф.

Етишти чу ул хайлнинг қошиға  
Ки, жамъ эрдилар шоҳнинг бошиға.

Скандар етишгач қўюб ерга бош,

Анга қилдилар шоҳ ҳолини фош.

Скандар тушуб келди Доро сари,  
Иши тушти рифқу мадоро сари.

Кўярарким, ётур жисми қон ичра ғарқ,  
Топилмай анинг бирла қон ичра фарқ.

Боши узра ўлтурди гирён бўлуб,  
Анинг ҳолиға кўнгли вайрон бўлуб.

Олиб қўйди ўз қўйниға бошини,  
Узориға ҳар ён тўкуб ёшини.

Чу бехуш уза септи андоқ гулоб,  
Очилиди анга нарғиси нимхоб.

Боши узра ким эрканин қилди фаҳм,  
Такаллумга тил очти бебийму ваҳм.

Деди: «Марҳабо, эй шаҳи навжавон,  
Жаҳон узра ҳам шоҳу ҳам паҳлавон.

Атодин ўғул бўлмағон сен киби,  
Адув узрини қўлмағон сен киби.

Нечаким хилофингда қилдим ғулу,  
Вале кўп қилур эрдим ул орзу

Ки, сендеқ кишиким жаҳон фардисен,  
Салотинда Доро ҳамовардисен.

Халойиққа йўқ ҳеч ишинг нисбати,  
Жаҳон ичра сен Тенгрининг қудрати.

Замоне кўзум тушса рухсоринга,  
Қулоғ мустамиъ бўлса гуфторинга.

Манга берди худ Ҳайи Доно мурод,  
Ажал айлаган чоғ вале номурод.

Етишти неким қилди Доро умид,  
Вале ўздин ўлғон замон ноумид.

Бўлубсен ажаб вақт меҳмон манга  
Ки, йўқтур нисоринг бажуз жон манга.

Бу соат нетиб мезбонлик қилай,  
Қабул айласанг жонфишонлик қилай!

Енгилдим, нетиб бўлғамен мизбон  
Ки, худ бир нафас мен санга меҳмон!

Бу соатки бошимға қўйдунг қадам,  
Не эркин хаёлинг, дегил они ҳам.

Агар ёрлиғдур шиоринг сенинг,  
Ики дахр аро Тенгри ёринг сенинг.

Ва гар қатл учун келмишанг қошима,  
Кесай деб қадам қўймишанг бошима.

Мурувват қилиб кесмагил бир замон,  
Ики-уч сўз айтурча бергил амон!»

Скандар қилиб ул такаллумни гўш,  
Чекиб мотамийлар масаллик хурӯш.

Яқо йиртибон, тожини тошлабон,  
Деди зор йифлай бу сўз бошлабон

Ки: «Бўлсун тирик ети кишвар шахи,  
Жаҳон бўлмасун бир дам андин тиҳи.

Анга мен камина парастандамен,  
Парастандалиғ ичра шармандамен.

Ўзумга керак қуллуғин чоғлабон,  
Анинг боргоҳида бел боғлабон,

Адувдин мубарро қилиб маъманин,  
Жаҳондин чикорсан эди душманин.

Тилим бормас айтурға бу сўзки, шоҳ  
Хирож истаб ўлди манга кинаҳоҳ.

Кўруб шаҳни бу навъ беилтифот,  
Юзумга менинг келди мунча уёт.

Сипаҳ чектиму зоҳир эттим хилоф,  
Аён айладим ўтрусида масоф.

Ва лекин бу ишдин хабардор эмон,  
Қилур эл била соҳибасрор эмон.

Манга етти бир нома ҳам бу замон,  
Ўқуб ташладим бўйла қилмай гумон.

Кетурганга гарчи сазо бермадим,  
Ва лекин бу ишга ризо бермадим.

Бу дамким аён бўлди бу можаро,  
Ёруқ олам ўлмиш қўзумга қаро.

Жаҳондорким Ҳақ анинг ёвари,  
Керак бўлса албатта бу бовари

Ки, розидур Искандар ўлмакка бот,  
Бўлуб шаҳфа минг йил замони ҳаёт.

Буким шаҳ деди: «Бор ики-уч сўзум»,  
Анинг йўлида мунтазирдур кўзум.

Мени ул муродингға ҳамроҳ қил,  
Буюрмоғи бирла сарафroz қил».

Чу топти Скандардин ул навъ баҳр,  
Дуолар қилиб, деди доройи даҳр

Ким: «Ул уч сўзум — уч васиятдуур  
Ки, изҳори кўнглумга ниятдуур.

Бириси буким, ул ики кинаҳоҳ  
Ки, қатлимға қўл сундилар бегуноҳ,

Алар қатлин ойини дод этгасен,  
Бу иш бирла руҳумни шод этгасен.

Йўқ андин манга гарчи дафъи газанд,  
Ва лекин санга бордуур судманд.

Яна қавму хайлимға қилма инод  
Ки, дерлар аларни Каёнийнажод.

Билурмен аларда йўқ андоқ киши  
Ки, келгай қўлидин адovат иши.

Карам айласанг, борча хайлингдуур,  
Қилурлар не хизматки майлингдуур.

Ҳабо айлама хонадони қадим  
Ки, йўқтур алардин санга ҳеч бим.

Яна Равшанакким, 20 қизимдур менинг,  
Буқундин нари менсизимдур менинг.

Каёний салотин нишони анга,  
Барозанда тожи Каёний анга.

Келиб салтанат баҳридин дурри пок,  
Шараф авжидин ахтари тобнок.

Бисотингни ул шамъ бирла ёрут,  
Анинг шуғлидин хотириингни овут.

Кивур меҳр бирла шабистонинга,

Қилиб ақд, ўлтурт ани ёнинга.

Ерур ул бузуғ мазраим хўшаси  
Манга пора бўлғон жигаргўшаси.

Ҳаримимда сен доғи фарзанд бўл,  
Ҳамул хаста бағримга пайванд бўл.

Ким ул доғи сендин топиб тўшае,  
Санга ҳосил этса жигаргўшае.

Атодин Скандарниҳод ўлғай ул,  
Анодин Каёнийнажод ўлғай ул

Ки, чун бел адолатқа чуст айлагай,  
Икимизга нисбат дуруст айлагай.

Қабул айлаб, эт хаста қўнглумни шод  
Ки, эмди қилур вақт эрур хайрбод!»

Скандар тўкуб ашку тортиб нафир,  
Деди: «К-ей шаҳаншоҳи гардунсарир!

Итоат йўлинда нузул айладим,  
Неким ҳукм қилдинг, қабул айладим.

Умид улки тавфиқ бергай Илоҳ  
Ки, руҳунгға қилғай мени узрҳоҳ!»

Ешиғтан чу мундоқ қабул этти сўз,  
Дегон чун эшиғти бу сўз, юмди кўз.

Ажал шоми тонг йўқ агар бўлса фош  
Ки, Баҳман кунига уёқти қуёш.

Адам бўлди қонуни Лухросбий,  
Нигун бўлди ойини Гуштосбий.

Бўлуб тийра Кайхусрав ойин чароғ,  
Сиёвуш ўти бағрига қўйди доғ.

Унут бўлди Ковус ёди доғи,  
Бал овозаи Кайқубоди доғи.

Манучехр руҳиға тушти жазаъ,  
Фаридун равониға етти фазаъ.

Чу Дорони даҳр этти жондин сутух,  
Скандар жаҳондори Дорошукух.

Солиб маҳди шоҳона ичра танин,  
Каёний маҳофа қилиб масканин.

Жудо айлади разм майдонидин,  
Ариф айлаб ул гард ила қонидин.

Топиб равзасон дашти мийнусиришт,  
Олиб сабзасидин насими биҳишт.

Тушуртуб ҳамул сабза узра си поҳ,  
Фалак сабзасидин ўтуб боргоҳ.

Ҳамул боргоҳ ичра тушган замон,  
Қилиб қатлдин элга ҳукми амон.

Кетур соқий, ул майки, жоне топай,  
Ғам ичра ўлардин амоне топай!

Ки, гар давр оғу берди Дороға бот,  
Скандарга ҳам бермас оби ҳаёт<sup>21</sup>.

Муғаний, бугун нағмаи чанг туз,  
Вале навҳа соз айлаб оҳанг туз

Ки, дардимға тортиб фифон йиғлайнин,  
Даме ўйлаким шиша қон йиғлайнин!

Навоий, жаҳонға вафо йўқтурур,  
Анинг даъбу расми жафо-ўқдурур.

Вафо айлаб онинг вафосин унут,  
Наво истасанг, бенаволиғни тут!

## XXVIII

Зобитаи русуми шоҳийдаким, корхонаи Илоҳийдин намудордурур, анингдекки, ул боргоҳда хоҳ малоик хайли, хоҳ русул маъшари, хоҳ авлиё гурухи, хоҳ сойири нос жамоати алоқадри маротибиҳим ҳар бири ўз ерида мураттабдур, бу коргоҳда ҳам ҳамул дастур била бўлса яхшироқ сурат, балки заруратдурур

Керак қилса, улким тилар шоҳлик,  
Сипаҳ борча ҳолидин огоҳлик.

Яқин билса тузганда пироясин,  
Риоят чоги ҳар киши поясин.<sup>1</sup>

Улуққа улуқча ато айласа –  
Кичикка кичикча сахо айласа.

Ким этса васатлиқ йўлинда зухур,  
Анга тузса ойини «хайрил-умур».<sup>2</sup>

Не тутса улуғни қошида кичик,  
Не қилса кичикни улуғ чаргалик.

Бу қонун била бўлса ойин анга,  
Топиб кишвару мулк тазийн анга.

Ишида кўруб фаррух анжомини,  
Олур салтанат амридин комини.

Не шаҳким, анга мундоқ эрмас тузук,  
Тузуклук нечук келгай андин, нечук.

Анингдекки тифл истабон инбисот,  
Чу шатранж ўйнарға ёйса бисот.

Не ўйнорини билса, не термагин,  
Не олмоғини билса, не бермагин.

Олиб қўйса байдакни шах ёнида,  
Яна пил қўйса рух айвонида.

Бу ойин била берса ҳар бирга ер,  
Ўзунг де, хирад аҳли они не дерғ

Бу ўюни аниңг нечаким чекса кеч,  
Ерур ҳеч, балким эмас доғи ҳеч.

Ерур ит сафолиға қўймоқ самон  
Ҳамону, сўнгак отқа солмоқ ҳамон.

Бўрига киши тұйма құлса қўзи,  
Ўзига бало ҳосил айлар ўзи.

Кориндин деса шер топсун наво,  
Бу ишни доғи ақл кўрмас раво.

Ким истар қорин бирла арслонни тўқ,  
Ёрап топса фурсат аниңг қорнин-ўқ.

Муносиб эмас тоз бошиға тож,  
Тумоға нутукчиға не эҳтиёж.

Не сунғурғаким тезпарвоздур,  
Мурассаъ тумоға ҳануз оздур.

Ешак оллида заъфарон хўб эмас  
Ки, нодонға зарбафт марғуб эмас.

Йилонни киши тутса саркўфта,  
Балодин қилур ўз йўлин рўфта.

Ва гар берса ўз жайби ичра маҳал,  
Ўзи қатлиғадур таноби ажал.

Йилон жайб аро солмоқ этма ҳавас  
Ким, охир йилюнтур бу, тасбиҳ эмас.

Ешик ит еридур, гар олсун бўри,  
Мушукка мақом ўлди уйнинг тўри.

Гар ул дашт сайдини айлар фигор,  
Ва лекин бу уй сайдин айлар шикор.

Не имконки саъй айламактин киши,  
Алар айлагай бир-бирининг иши.

Анга ўз ерида керактур ҳуриш,  
Мунга доғи ўз ўрнида парвариш.

Киши яхши боқса зарурат чоғи,  
Кераклиқдурур бу доғи, ул доғи.

Яна бир доғи турфа суратдурур  
Ки, шаҳ билмак они заруратдурур.

Буким, тутса ҳар кимса таврини пос,  
Фаросат била бўлса жавҳаршунос.

Кўруб лаъл, ахгар гумон қилмаса,  
Ҳам ахгарни гавҳар гумон қилмаса.

Жудо қиласа хармуҳра ферузадин,  
Бутун чини ўлса синуқ кўзадин<sup>3</sup>.

Ерур лек бу ишта душворлик  
Ки, бор даҳр эли бир намудорлик.

Кўрунур бори одами одами,  
Мушобиҳ нечукким сипеҳр анжуми.

Бу бирга нухусат иродатдурур,  
Яна бирга нури саодатдурур.

Киши бўлса ҳам, филмасал, тавъамон.  
Бўла олур ул яхшию бу ямон.

Китобатда бирдекдур алфу алиф,  
Ҳисоб ичрадурлар басе муҳталиф<sup>4</sup>.

Биёбонда ўлуб қуруғон кашаф,  
Ерур ҳайъат ичра нечукким садаф.

Эрур лек бу бирда дурри ятим,  
Яна бирда бир неча азми рамим<sup>5</sup>.

Эрур нахлдек шамъу муз шушаси,

Мунунг ўт, анинг сувдуур хүшаси.

Ушоқ қанд ун-тузга монанд эрур,  
Ва лекин бири туз, бири қанд эрур.

Хумо доғи бор, ўйлаким каркас,  
Вале бор ароды тафовут базе.

Вале шаҳға нури фаросат керак,  
Шуносолиғ ичра киёсат керак

Ки, кимсондин олтунни фарқ айлагай,  
Қизил тобадин кунни фарқ айлагай.

Ва гар бу басиратдин ўлса йироқ,  
Үкүш имтиҳон қилғони яхшироқ.

Ва гар илгига тушти донишвар эл,  
Фунун ичра оройиши кишвар эл.

Керактур алар бирла навъи мааш  
Ки, хотирлари топмағай кўп харош.

Йўқ улким карам кўргаю бас киром,  
Керак рози андин хавосу авом.

Агар шоҳдин халқи хурсанд эмас,  
Адув қасди қилса хирадманд эмас.

Не душманғадур тиф чекмак фани  
Ким, ўз хайлидур сарбасар душмани.

Зафар, ўйла шаҳдин канор айлагай  
Ки, хайлини душманға ёр айлагай.

Агар йиллар элдин мадоро бўлур,  
Зарурат чоғи ошкоро бўлур.

## XXIX

Султон Абу Саид Кўрагон наввара марқадаҳу ҳикоятиким, ройи уқдакушойи била кўп  
мамлакат олди ва тифи умрфарсойи била кўп элга ошуబ солди ва лекин сипоҳи рози эмас  
эркандин иш вақти борча қўзғолди ва ўзи аъдо аро маҳлакага қолди, балки хасм ул  
сарафрознинг тифи кин била бўйнин чолди

Шаҳеким<sup>1</sup> иши хурдадонлиғ эди,  
Лақаб отига Кўрагонлиғ эди.

Хурросон била Мовароуннаҳр анинг,  
Булардин доғи бошқа кўп шаҳр анинг.

Олиб мулки Хоразму Кирмонғача,  
Яна Кошғардин Сипоҳонғача.

Бўлуб Зобулситону Кобулситон,  
Баҳори муроотидин гулситон.

Олиб даҳр аро беадад мулку шахр,  
Бўлуб салтанат ичра дорои даҳр.

Солиб донишу пухта тадбирлик,  
Бошига ҳавои жаҳонгирлик.

Каронсиз сипоҳиға берди ҳужум,  
Юруб қилғали фатҳ Табризу Рум.

Ҳунар кўп бериб олимул-ғайб анга,  
Вале бор эди бир ажаб айб анга

Ки, маҳзан йигорға солиб майлини,  
Тутар эрди танқис ила хайлини.

Ул андешадин кўнгли хурсанд эди,  
Сипаҳ шоҳдин норизоманд эди.

Чу чекти сипаҳ ул навоҳийға шоҳ,  
Навоҳий шаҳи доғи йиғди сипоҳ.

Мамоликка юзланмасун деб халал,  
Чиқиб ўтру изҳор қилди жадал.

Қотиғлаштилар ишда ҳаддин фузун,  
Адоватнинг айёми чекти узун.

Чу шаҳдин сипоҳ эрди озорлиқ  
Замонеки юзланди душворлиқ.

Бузуб ҳар тарафтин сипаҳ шоҳни,  
Анга айлабон чийра бадҳоҳни.

Йўқ улким қочиб, шаҳға бедод этиб  
Ки, бориб адувсиға имдод этиб.

Анингдекки дорои гардунсарир  
Адув илгига бўлди зору асир.

Фалак чунки бемехрлик қилди фош,  
ғурууб этти ул навъ равшан қуёш.

Аодиси қасд айлабон жониға,  
Қилич лаългун қилдилар қониға.

Не шаҳдинки атбои хушнуд эмас,

Пушаймонлиги иш чоғи суд эмас.

Сипаҳдин жудо шоҳ эрур бир киши,  
Не бўлғусидур бир кишининг иши.

Курур чун гулситондин айрилди гул,  
Ки бир луқма этдур бадансиз кўнгул.

Анингдекки хушдур сипаҳ бирла шоҳ,  
Ҳам андоқдуур шоҳ бирла сипоҳ.

Шаху хайл маъшуқу ошиқ керак,  
Не ишким қилурлар мувофиқ керак.

Жаҳон олмоқ осон сарукор эмас:  
Вале иттифоқ ўлса душвор эмас.

### XXX

#### ҲИКМАТ

Искандарнинг Арастудин саволи ул бобдаким, сохиброй тааққул била иш бикри юзидин  
ниқоб очқондин сўнгра нега висолидин ком топмас ва анинг жавоби

Яна қатла дорои гардуншукух,  
Деди: «Кей ҳакими Филотуншукух»!<sup>1</sup>

Кишида не феълеки мавжуд эрур  
Ки, андин зиёнбуд ё суд эрур.

Чу феълига боқса тааққул била,  
Натижасин англар тааммул била.

Билурким тамаъ айлар элни залил,  
Қаноатқа иззу шарафдур далил.

Эрур шоҳ ишига доғи бу қиёс  
Ки, чун бўлди беҳбутига раҳшунос

Ки, мақсад топар эл ризоси била,  
Турап кўп халойиқ дуоси била.

Тилар вокиан ишда ўз судини,  
Қилур орзу кому беҳбудини.

Недин бас қилиб тарки ройи савоб,  
Қилур нохуш афъолни иртикоф

Ки, андин етиб шавкатига шикаст,  
Бўлур зердастиға ул зердаст?»

Деди кордон фикрин айлаб амиқ  
«Ки, бу сўз аро нуктаедур дақиқ.

Кишиким билик баҳриға топти ғавр,  
Бу сўзнинг жавобин деди неча тавр:

Бир улким, киши ақлин этса ҳакам,  
Салоҳу фасодин топар бешу кам.

Салоҳин анинг табъи айлар писанд,  
Билур қиласа бўлғусидур судманд.

Вале қилмоғи нафсиға шоқ эрур,  
Сухулат сари нафс муштоқ эрур<sup>2</sup>.

Қачон нафс ўз комин этти ҳаво,  
Қилур элни кўп нафъдин бенаво.

Яна кимса ҳар ишга мажбул эрур,  
Жибиллий хисолига машғул эрур<sup>3</sup>.

Топиб иш салоҳин ёмондур демас,  
Анга лек биттабъ марғуб эмас.

Тилар қилмоғига ўзин баҳтиёр,  
Ерур лек қиласда беихтиёр.

Яна бир қилиб фикри ахтарпаст,  
Кавокибга қилди ани борбаст

Ки, гар ёр эрур ахтари толеъи,  
Қилур, ўйла ишким эрур нофеъи.

Китобатки шуғледуур бас нафис,  
Бирор истаса ўзни мушафнавис.

Агар толеъида юз иқбол эрур,  
Аторид<sup>4</sup> vale анда бадҳол эрур.

Китобатқа саъй этса то жони бор,  
Қаламзан бўлурнинг не имкони бор?

Бу уч сўзга бу навъ бўлди насак,  
Вале улча дерлар будур аҳли Ҳақ

Ки, гар аҳли масжид эрур, гар куништ,  
Неким топти қисмат куни сарнавишт,

Неча айласа фикру тадбир анга,  
Йўқ имкони қилмоққа тағирил анга.

Қаю ройким топти они савоб,

Бўла олмади шуғлиға комёб.

Жиҳат будур, улким тилар важҳи рост  
Ки, йўқ эрмиш ул ишда Тенгрига хост,

Гар иш фикрини топти тадбир ила,  
Бу тадбири туз келди тақдир ила.

Ҳам эрмас анинг рою тадбиридин  
Ки, ул ҳам эрур Тенгри тақдиридин.

Ҳамул хайлким аҳли таҳқик эрур,  
Бу иш ул эл оллинда тавфик эрур.

Муваффиқ букун сенсен, эй покзод  
Ки, ҳар кун бу тавфиқинг ўлсун зиёд!»

Ҳаким ўлди бу навъ чун нуктасанж,  
Насиб ўлди ул нуктадин шаҳфа ганж.

Ҳамуш ўлди жонини равшан қилиб,  
Бу сўз бирла кўнглини маҳзан қилиб.

Алишер Навоий номидаги Ўзбекистон Миллий кутубхонаси  
Алишер Навоий номидаги Тил ва адабиёт институти